

~~49~~
30

HARVARD COLLEGE LIBRARY
FROM THE
HARVARD-YENCHING
INSTITUTE
SEP 30 1929

7.8.

Ch. L. 5570.2928

T 5237.782928

明詩綜卷七十三

小長蘆 朱彝尊 錄



淮陰 楊開沅 緝評

黃端伯 五首

端伯字元公建昌新城人崇禎戊辰進士除寧波推官改杭州歷禮部郎中南京既下死于市有瑤光閣集

靜志居詩話元公近體瀏亮雖注意逃禪都無蔬筍之氣絕命辭云欲識分身處刀山是道場靈運可以作佛矣

從軍行 二首

萬里長城北蕭條白草荒風沙吹不去秋色正茫茫日冷行空壘天低壓戰場別來一回首何處是家鄉

遼落蕭關外陰風萬馬肥至今勞北顧何敢念東歸
戎傳金柝寒沙卧鐵衣戰場春不到白雪作花飛

山陰道中

夙昔流觴地回溪曲曲盤遙憐沙月迴漸覺海天寬
暮色橫烟暝春陰閣雨寒自耽泉石趣無夢到長安

建德道中

青天霜氣迴匹馬立平沙遠道風千里寒城月萬家
亂山盤徑險深樹引堤斜夙昔悲秋意偏於作客賒

夜泊龍湖登仙居閣

閣夜鳴風迅江天度月寒石林幽獨到沙路暝相看
倒樹斜懸壁驚濤急下灘長懷仙境勝便欲棄儒官

徐汧一首

汧字九一長洲人崇禎戊辰進士改庶吉士授
簡討歷贊善諭德庶子升少詹事家居投水死

三月十九日

珍饌精鏐賜講筵每逢令節主恩偏十章書未陳金鑑
九逝魂猶戀細旃社稷風雲誰奏曲園陵霜露已經年
龍髯回睇橋山遠玉匣珠襦不忍傳

顧咸建一首

咸建字漢石崑山人崇禎癸未進士除錢塘知
縣死于官

詠落葉

杖策滄江思不禁乍逢搖落一驚心
迎風野鳥當枝坐
泣雨寒蛩抱葉吟
埽徑空餘千樹曉
卷簾獨對萬峰陰
幽居一夜聽蕭瑟
片片隨流不到林

陸培一首

培字鯤庭仁和人崇禎庚辰進士除行人家居
死難

詩話大行風概自特卒蹈桐鳴之節曩與陳公朱明以文社不相能大
行既就義陳公亦赴越江以死曰吾生何面目見鯤庭於地下今兩公
並祀忠烈祠

絕命詩

誰謂朝廷一命輕
行人使節本皇明
春秋官敘諸侯上
周禮班從司馬名
雍國尚慙收采石
荆胥無計泣秦兵

蕩陰徒有前衣血
烈帝孤臣恨未平

祁彪佳一首

彪佳字幼文紹興山陰人天啓壬戌進士除興
化府推官選授福建道御史巡按蘇松改南京
畿道以大理寺丞轉巡撫應天都御史謝病歸
乙酉閏月自投寓園池中死

詩話祁公美風采夫人商亦有令儀閨門唱隨鄉黨有金童玉女之目
其司理莆陽也慮閩人語近侏離預遣人潛往買二鹿婢詢其鄉音及
升廳事胥吏多操土語侮公公佯不知浹旬後按籍遍召在官人至一
一聲其罪衆驚以為神迨入為臺諫即進封事略云凡文武內外大小
諸臣必使之安其位而後各盡其心邇來六卿九列之長詰責時聞引
罪日見因而周章急遽救過不遑竊恐當事諸臣悚於嚴旨冀以迎合
揣摩善保名位臣所慮於大臣者此也人材中下參半藉上感發其忠
義鼓舞以功名今司道有司或欽案之累由人或錢穀之輸未足降級
住俸什居二三必至苟且支吾急功赴名之心不勝其掩罪匿瑕之念
臣所慮於羣臣者此也陛下聞鼓鼙而思將帥之臣儻得真英雄即推

轂設壇夫豈為過一或獎拔之術未盡則冒濫之竇將萌臣所慮於武臣者此也陛下深懲惰窳特遣內臣撫按之事多令監視正恐同罪同功反使互蒙互蔽開水火之端其患顯啓交結之漸其患深臣所慮於內臣者此也其言切中思陵時弊故其後亡國卒由此數端云公嘗治別業于寓山極林壑之勝乙酉閏月六日坐園中題其案曰圖功為其難潔身為其易吾為其易者聊存潔身志含笑入九泉浩然留天地又書曰已治棺寄戢山戒珠寺可取以斂我是夜兄子鴻孫侍側夜分不寐公第曰君子之愛人也以德逮鴻孫倦隱几步至放生碣下投水味且猶整巾帶立水中子理孫班孫葬之園
苟舍池館為寺塑公像于堂至今存焉

豐莊

為愛農家樂莊居築圃場秧鉞霑雨足稻子過風香北
郭依桑樹東皋接藕塘主人多種秫春酒足壺觴

劉宗周

二首

宗周字啓東紹興山陰人萬曆辛丑進士授行
人遷禮部主事歷光祿寺丞尚寶少卿太僕少

卿引疾歸尋補右通政削籍起順天府尹再引
疾歸起工部左侍郎以左都御史掌都察院事
乙酉六月不食死有戢山詩集

詩話先生家居恒服紬花布衣士大夫爭效之布為長價吳江趙士諤知會稽縣事嘗問先生疾造榻前出而歎曰豈意今日得覩管幼安萬曆丁巳京察議及先生士諤時為考功郎爭曰劉大行之清修人所不堪此士諤之所親見者乃止吾鄉吳太嘗為齋於天啓壬戌登第之前夢一隱者誦文信國山河破碎風漂絮身世浮沉雨打萍之句問其姓名曰劉宗周也太嘗不省時念臺先生以儀曹郎知貢舉相見驚訝其後交契歷間甲申之變太嘗死之逾年先生里居絕粒旬有四日而終遺詩云信國不可為偷生豈能久予嘗造先生廬堂不過十笏京兆干旌尚存思陵曾賜勅云蔬食菜羹三月不知肉味
敵車羸馬廿年猶是書生先生當之信可無怍

出通州用友人韻

策蹇何所之遭時亦云厄一步一回首四郊營壘迫大
道宜如矢青天萬古闢從此遂已而身後令人惜

酬別長安故人

弱柳千章鎖鳳樓春風送客不勝愁杜門重憶十年病
束髮誰先天下憂銷鑠壯心吾自老傷徬岐路子何求
却教空谷傳驪唱落日浮雲滿帝州

温璜 一首

璜初名以介字于石烏程人崇禎癸未進士除
徽州府推官乙酉六月死于官有貞石堂集

詩話温公少孤母陸孺人鞠之破屋一間無帷帳姑沈病且餓同坐卧
一板箱種火煨粥以為食教其子讀書姑卒孺人哀毀如子天啓七年
公請于有司聞于朝詔旌其節孝又一十八年而公成進士年六十矣
司李徽州聞國難恒引佩刀歎曰此身當付汝及城破先殺其女寶德
次殺妻茅妻女皆延頸就死乃自刎公初名以介注名復社第一集不
以兄在相位見擯于清流後禱夢於于忠肅祠夢忠肅語之云子不當
名以介宜更曰璜遂更焉
陸孺人著有家訓行於世

寄友

靈隱峰前手暫攜千章新綠子規啼眼邊流水春重到
別後停雲思幾迷俯聽露珠傳點畫驚聞藥裏急刀圭
殷勤簡付遺方法茹澹安緣緩杖藜

左懋第 一首

懋第字仲及萊陽人崇禎辛未進士除澄城知
縣選授戶科給事中歷刑禮兵三科升太嘗少
卿巡撫都御史以兵部右侍郎兼都御史督師
河北充通問使不屈誅

詩話左公將北行貽書姜給事塚大略謂國遭大故二東不聞有斷頭
穴胸以報故君者彼鄒魯仁義之稱安在懋第此行是懋第死日也既
入燕卒以閏月十九日死于市新城王尚書士禎池北偶談云公母徐
寧海儒家女甲申京城陷從子懋泰載以歸行至白溝河仰天歎曰嗚

呼此張叔夜絕吭處也呼懋泰前責以不能死國且曰吾婦入身受國恩不能草間偷活寄語懋第勉之勿以我為念言訖而死蓋出都不食已數日矣是母是子前史亦不多見

道上

歸鴻昨夜過紅葉見秋深念我籬邊菊思君石上琴舍
車眺水色倚樹聽風音舊業荒東海悠悠此際心

徐石麒 十五首

石麒字寶摩青浦籍嘉興人天啓壬戌進士除
工部主事削籍崇禎初起補南禮部尋改吏部
升南尚寶卿應天府丞歷吏部尚書有可經堂
集

詩話冢宰歸田之日築堂于郡榜曰可經人不解其故及乙酉城被圍公度必不能守步自東門入城破自經于堂始信公之就義立志已久

蓋與昔賢止水之意脗合焉公古今詩俱新警不作規
撫蹈襲之語鍾嶸詩品以落花依草喻丘遲公實似之

贈同鄉朱六符

予本同圃蒿飄在天一端咫尺粉與梓邈若霄漢間翔
鳥憩前林猛虎戀故山傷茲遠游客中夜積悲歎忽遇
故鄉友驚喜相盤桓把臂問舊事耆舊半摧殘憂根長
愁條淚下如奔湍樽酒非不旨安能起沉歡幸君到故
園為我傳平安

憩古墓作

郊游無名山荒丘且踏屣古木既叢叢豐草亦靡靡隔
葉隱幽禽清音啼不已石馬被文韉翁仲夾而侍不能
驅牛羊朝暮齧其址此中陳死人井樽安足恃所以楊

王孫裸身無乃是

送錢車駕左遷歸里

依依鍾山雲坦坦石城道驅車出龍關送我昔所好舟
子且停橈聽我歌草草巧仕有別才置身青雲表夫子
天下士紉佩祇蘭藻忽失上官意飛章注下考粲粲當
塗子片言由意造散宜策獻姝季路曾請禱奈何堅弗
應深文任顛倒平生久要者棄置迹如埽豈曰無蹇修
洵美非吾寶長嘯歸去來形容豈枯槁君家錫山下門
逕鬱蘿薦雲乳發冽泉雪花散香稻潔白養高堂此樂
詎可討臨別重躊躇申言豁懷抱

謝劉太史湛陸惠詩

予曾過大梁臨風懷伊摯秉耒耕莘疇遽抱唐虞志一
民不時雍內溝發深思此道久已陳夫子願躬試文行
動至尊頭龍親簡置旣窮太乙奇復發鴻寶祕早晚宜
相麻天下乃得治麒也嵒窳人所受盈其器承乏白雲
省爰書失聖意投荒分所宜而况僅播棄譬如纍碁者
纍高勢自墜烽火滿近郊逐臣正遷次感君懷芍藥題
扇以相遺奄然蓬蒿人儼若佩華璫此情何可酬此念
何可寘頓令松柏心白首欲自刺

臨鏡

攬鏡照病顏不知鏡裏誰似鬼有微息似人無雙頤似
容貌何似是我何其羸展轉不能視掩鏡還自悲頭顱

今如此百年寧所期安仁三十二玄鬢已成絲而况三
十三於潘更長之江南多早衰昔人已如茲假令彭與
錢臨歿等殤兒夭壽何足異尻輪惟所宜昔人有明訓
樂天復奚疑

苦寒行在句曲道上

天寒敝絮僵如鐵車輪乍轉車聲咽歷過千山萬山雲
時飄三點五點雪皮膚蜩縮毛髮張蹇驢蹄滑愁道長
暮烟一點青句曲鞭梢遙指此中宿

明月行懷王大基生

今年月是去年月去年人作今年別去年對月兩相將
今年對月腸斷絕腸斷絕子起徬徨中庭重露如凝霜

綠錢盈階時草芳縈予懷予不能忘丈夫骯髒寧有淚
已覺簌簌沾衣裳歲如馳予不我與望美人于天一方
仰天歌子夜將旦明月黯黯予沉垂楊

曉發新州

江抱新州碧沙仍舊日黃難期晴雨色莫辨水雲光逆
旅便風俗征人漸老蒼平生我任達久矣破行藏

次團江

下馬團風許烏林舊戰場楚弓沙月白吳壘戍雲黃鑑
影涵天遠襟流束地長江聲疑有恨如欲訴興亡

黃州晚泊

赤壁雲初暝烏林日漸紅波搖兩岸火人語隔江風夢

鶴捎天路然犀逼水宮天寒游子意清夜月明中

望匡廬

突兀此何處匡君廬亘天黛浮五老壁青入九江船
慧遠林中寺康王谷口泉苻生今已老誰與買山錢

過安慶

百戰舒州地英雄久寂寥潯陽懸暮色滄海落歸潮
楚竹然魚子汀蘆宿雁寮金陵行且近不斷瑞烟飄

池口有懷

黃鶴池邊鶴金雞石上雞乘雲千載去落月幾回啼
不見仙人跡空傳過客題蕭條暮江上腸斷楚天低

次蕪湖

倚櫂鳩茲邑山光雜水氛估檣蟠郭遠市語隔江聞
烟氣凝爲霧歌風散入雲古來佳麗地無日不紛紛

夜發靜海抵直沽

禾黍高低弄夕曛檣燈零亂破黃昏樹蒸夜氣三分雨
帆裏秋烟一葉雲靜海金鉦鳴古戍直沽牙閫駐新軍
援遼已竭東南力何日辰韓報策勛

張翊一首

翊字叔韓秀水縣學生城破整巾襪南向正席
坐兵以刃臨之罵不已遂遇害

鶴夢

百禽正嘈雜此鶴獨孤眠奮翮豈無俟藏神亦偶然庭

中人寂寂松下月娟娟知入寥天去緱山何處邊

項嘉謨 一首

嘉謨字向彤一字君禹秀水人有讀選堂詞賦

集

譚梁生云向彤阮仲容謝幼輿一流詩篇都雅簡勝

詩話向彤投筆遠游渡河出塞尋入闔登武臣曹能始錄其詩入十二代詩選乙酉閏六月城破東平生所著詩賦于懷投天星湖死于翼妾張從焉向彤墨林之孫賦性儻曷不羈中歲產落歲辛巳年飢糧絕從父以五斗米貽之妾張為執爨知向彤不甘澹泊以二升米易乾魚進飯向彤怒曰乾魚豈可下箸邪復以米三升易炙雞乃飯予家與向彤鄰竈婦述之以為笑謂是君屐子弟栗果少年而視死如歸可敬也已

晚次蕪溪

人家遠見女牆頭客到城邊盡繫舟薄暮寒蟬聲未歇
心隨楊柳送殘秋

錢應金 三首

應金字而介一字仙上嘉興縣學生城破走村
居游兵掠郊野見其髮未開剃遂見殺有古處

堂集

詩話而介雅以詩詞名而今存者無幾

屺閣贈周幼文

謾謾山上松磊磊澗中石託根非不深所貴在貞白白
華志養親陟屺怨行役懷古徒悠悠瞻母時脈脈綺疏
闢南楹抗言恣墳索曲鍼不受磁腐草不受珀冰霜歲
云晏至理在琴冊

沈甫受蝶花居秋色詩

沈郎八詠世爭誇草色庭中不讓花秋氣逼人清入夢

夢騎蝴蝶到君家

邗溝

烟荒月淡古邗溝
淮水遙連江水流
六代繁華餘腐草
至今螢火照揚州

侯峒曾 二首

峒曾字豫瞻蘇州嘉定人天啓乙丑進士除南
兵部主事調吏部歷郎中出爲江西提學副使
轉廣東右參政調嘉湖道升順天府丞歷左通
政使乙酉秋縣城破赴水死

詩話萊陽宋公繼登備兵嘉湖夜有白猿竊其衣冠服之搗鼓升廳事
時海寧袁秀才祿留公幕中猿入臥室披其帷秀才大愬公命隸卒環
守而猿之往來如故也予童子日偕諸昆弟行精嚴寺街人爭聚觀謂
猿方坐鍾樓啖果子審視獨未之覩其後納言至止猿乃潛蹤又嘗熟

時敏知海寧縣事夜草爰書有女子侍側磨墨問從何來曰鬼也敏旣
擢給事中之者侯官林奎鬼自是不復至侯公林令俱忠臣以此知
邪不勝正
理有然者

晚行餘杭山中

解鞍一散步羣峰亂將夕
浮嵐幕遙青喬柯拂深碧
須臾落霞散銀紫紛狼籍
尋蹊得絕澗驚深互歎射
有如翠蛟舞飛下三千尺
一步一回顧已覺耳目易
此景宜急追一失難再獲

送表弟楊維斗解元上公車

赴隴徵書有曠恩仍偕計
吏謁金門時危漸覺科名薄
道在還知禮樂尊老子甲兵
今孰仗嗣宗臧否不輕論
冰霜歲晚孤征夜襍被應知
手綫温

侯玄演 二首

玄演字幾道通政峒曾子

雜詩

道喪向千載百家日浸淫如彼鐙磬歇
逐響遺其音元宰何微茫悠悠費追尋
世皆尚彫飾未敢明此心微言會將絕
太息空撫襟

和新柳詞

秦淮雪凇緩春晴十里烟堤綠未明
早是酒旗歌板地隔江風浪卷蕪城

侯玄潔 二首

玄潔字雲俱亦通政峒曾子

癸未九日寓崑山

肺病經三月秋深寄古祠近山寒更
早多雨菊翻遲漸減文章樂能忘寇盜
悲今朝無客至今節竟誰知

示智含

天王十五年來事孤客三千里外人
望闕尚留年少哭哀時偏見異鄉春
坐愁南郡征輸日行過江黃戰伐塵
直北大荒空草木春風生事又黃巾

黃淳耀 十二首

淳耀初名金耀字蘊生蘇州嘉定人
崇禎癸未進士乙酉家居城破自縊有
陶菴詩集

詩話陶菴精於書義融會九經諸史審擇而出之當崇禎之季方以駢兩相尚不知者以爲陳言予叔父芾園先生獨賞心擊節盡以其彙授

子讀之久之而漸有稱焉者如雅頌得所樂有堂上堂下之分又孔子未嘗刪詩伯鯨未嘗誅死皆至當之論乃邇來選家以其未盡合乎朱子之集注章句痛加塗抹是何異於下士之聞道乎詩亦堅厚無懦響由不惑於楚人之咻然也

和陶飲酒

朝光入山樓棲鳥已驚喧攬裘暴新陽暖氣無頗偏仰
視天宇清得我檐前山山中出岫雲變滅何時還我心
正惆悵默與風鈴言

和癸卯歲始春

舊穀滿場圃知子良非貧糟牀注春醪酬汝四體勤開
軒一笑粲莫適爲主人薜牙花乳香繪縷銀絲新咄嗟
行酒炙童僕皆欣欣中原有格鬪行子勞問津不能濟
時代廿與農圃鄰逝辭謝景夷來就劉遺民

和乙巳歲三月

西崦有佳花首春烟霧積良游阻塵鞅耿耿懷在昔野
寺流晨鐘雲林矯風翻湖山光皎鏡千里如不隔之子
天機深平吟謝形役一持金石韻如與清賞易幽悰方
悃劬况復暫離析寄言山中久參取庭前柏

和歸田園居

家無環堵宮所至思買山何異俟河清人壽期千年安
得如古人采山復臨淵敬受十賚文賚以北阪田巖棲
高百層老屋餘三間湖江流東西竹木榮後前中央置
講堂文史浩如烟歌風復蹈雅樂志忘華顛此意恐蹉
跎飛光去閑閑畫餅不可食談諧聊復然

和擬古

三首

亭亭采桑女清光映城隅羅衣出纖手皎若春萸舒芳
風何飄飄薄暮歸重廬行子皆歎息願言與之居空簾
隔星漢白露委薜蘿淵意不可道蹇修定何如

步上姑胥臺恣風來大荒古墳何嶢嶢下有黃金堂寶
衣化寒灰月露浩茫茫前朝割據時復作繁華場侯王
及廝役聚斂歸北邙感此拔劍舞青山爲低昂秉燭方
視夜歛忽明東方我非好名人亦起羊公傷

弱年見承平自謂長如茲一從更事來世已非前時雕
虎橫井陘黃流混澠淄杖劍出門去行行復狐疑路逢
季主儔問彼龜策辭龜策不我告黽勉自研思仁義心

所安皇天吾不欺瀉水置平地東西任所之撫琴操倚
蘭亂之以俛詩

野人

二首

野人歎息年歲惡池中掘井井底涸飛蝗引子來蔽天
辛苦將身事田作朝廷加派時時有哭訴官司但搖手
歸逢吏胥狹路邊軟裘快馬行索錢

野人歎息朝無人朝中朋黨如魚鱗十官名對九官默
篋中腰下皆黃銀不知何人理陰陽頻年日食四海荒
我欲上書詆朝士又恐人呼妄男子

虞山喫虎肉作

猛虎入山山氣惡腥風倒射巖石落兩三邨甍不識虎

謂是旄牛未生角扼虎之吭擊虎尾虎驚不及施牙背
東海無煩赤刀制南山已報白額死老夫羈旅春盤空
短衣匹馬行山中坐分羹臠飽欲死拔劍四顧吾何功
邨忙邨忙莫倉卒儒冠為爾頻衝髮人間真有猛於虎
勸爾拔身辭虎窟

次韻酬別張子石

百丈牽江一線平勞君客裏念歸程即看去住誰能料
可是分離莫漫輕白鳥背飛星子驛朱旗遙颭石頭城
船牕日把詩篇坐香草含風處處生

張貞白有離世之志作別廬舍詩見示余及其意
留之

瓜廬小結在塘坳城市倏然即遠郊谷為愚公寧避辱
亭因楊子不辭嘲鳴蜩秋盡猶緣砌舞燕春深亦認巢
莫愛雲松棲絕壁山中依舊要誅茅

龔用圓

一首

用圓字智淵蘇州嘉定人天啓辛酉舉人嘉興

儒學教諭

侯雅瞻云先生司鐸嘉禾先伯兄方應備兵之命俾攝
郡司馬事寇盜屏息迨聞南都不守挂冠歸里城破兄

弟赴水家人入城蹤跡之於大柳樹下有二尸相抱持其一肘間懷印
則先生兄弟也邈哉先生千古為烈矣 顧端木云膠城既破龔博士
智淵與兄用廣弟用厚猶子元韶元朋元增及閨閣
殉節者五人先生苦心學殖篇章頗富惜散佚不傳

湖上遇同年朱子暇

一見相攜話舊遊湖光汎汎斷橋頭寒烟迷却西泠路
還向當壚問酒樓

馬元調 一首

元調字巽父上海儒學生僑居嘉定人稱簡堂先生

從師遊棲霞寺

吾昔遊棲霞同人催北渡未識山中僧那辨山下路巖澗迷東西欲記恒恐誤先生理舊游小子愜所慕

黃毓祺 二首

毓祺字介子江陰學生有大愚老人遺集

画竹引贈朱白民

長風從天來吹我魂飛飛飛上謁天帝扉天帝問我何所欲不願為人願為竹帝笑黃生無乃太癡竹有何

好而爾願之我不願截為竿大魚小魚慘不歡我不願截為杖化龍君山之湖上我不願截為簫鳳子鳳子不可招我亦不願娥皇女英哀哀攀我泣重瞳馭遙叫不得朱白民朱白民願伊為我一寫真貌我形似兼精神所以願為竹不願復為人

不寐憶元兄南行

暗風吹雨夜蕭森布被繩牀冷不禁老別匪徒三日惡淡交奚止十年深案頭飢鼠縱橫出階下寒蛩斷續吟遙憶孤舟蘆荻岸有誰同我此時心

夏允彞 二首

允彞字彞仲號瑗公嘉善籍松江華亭人崇禎

丁丑進士除長樂知縣以吏部行取補考功主
事旋歸里乙酉南京下自投池水死

詩話幾社六子瑗公以經義見長詩非專尚然其撰長樂志境有孝子
節婦必賦詩以旌之集中樂府未嘗不合古人也野史述瑗公授命在
乙酉五月第集有練川五哀詩按練川城潰乃是年七
月五日瑗公尚存則止水之投當是松江失守之日爾

襄陽踏銅鞮

辛苦襄陽女織縑還織素縑成身上衣素作風帆布

黃進士淳耀哀詩

黃子不偶生大雅寡諧俗羽儀乍高翥結綬匪所欲黃
雲暗蒼梧北風號大陸烽火滿吳關下邑勢彌蹙緬彼
二三子登陴自躑躅城郢旣已乖號秦又誰告處死良
獨難苟生何能淑吁嗟烈士心伯仲互相勗威鳳旣在

羅恥與凡禽逐未知沒者悲但見存者辱存沒兩茫茫
思君不可贖

睦明永一首

明永字嵩年丹陽人崇禎壬午舉人選授華亭
儒學教諭乙酉八月三日松江城破自經不死
投泮水被執不屈見殺有世經堂橐

臨江觀古意

即今懷
關樓

煬帝飛樓屈紫霄檻拍長江接海潮三千殿脚南巡汴
百萬舟師東下遼晉陽戈甲從天起仁壽宮中泉作醴
檻外楊花依舊飛千里桑田隔江冰

顧咸受一首

咸受字幼疏崑山人天啓甲子舉人縣城破死
于難

落葉

天半淒清鴈字斜箇人無賴小牕紗三分秋色三分雨
半似霜容半似花忽送離愁迷曲徑暗隨幽夢度平沙
無情最是堪腸斷不爲蕭條惜物華

梁于涖 一首

于涖字飲光江都人崇禎癸未進士除萬安知
縣陣沒

竹西亭

茱萸灣水渙渙上有孤亭峙高岸而今冷落荒烟斷遊

人不來蒼鼠竄問竹西人不辨惟有隴上舊耕夫五十
年前說曾見

麻三衡 二首

三衡字孟璿宣城人選貢生屯師姑山兵潰被
執死于市

詩話孟璿注名復社遽賦無衣陳安未克生還狼曠已得死所詩如落
日照荒野亡猿懷故林魂銷分劍日心折覆巢時草閣新寒入江邨落
雁多一身去鄉土雙淚滿滄洲吳兒望歲唯呼雨楚客憂生盡憶家夢
回塞上雙流淚家在淮南獨倚樓萬山茅屋白雲滿十里白溪紅葉飛
殊自超
超朗朗

贈錢聖月

不寐成搔首蕭然獨寤歌霜天砧響急庭樹雨聲多酒
力三更緩愁心萬緒過錢郎戀明主獻賦意如何

春興

二月新雨歇春流始到門叢筠連晝暝新燕掠波翻山
靜鹿無迹林香風滿園中原多轉戰幾處欲招魂

沈壽堯 一首

壽堯字景山宣城縣學生死于難

即事

幽棲如久客日暮起啼烏橘實寒猶在梅花凍欲無聞
鐘山寺遠聽雪夜燈孤賴有牀頭酒長吟可不沽

王養正 一首

養正字聖功泗州人崇禎戊辰進士除海鹽知
縣以憂歸補秀水謫河南按察司簡較升襄陽

推官入為刑部主事歷員外郎出知南康府遷

江西按察副使建昌既下繫至武昌遇害有漫

吟等集

對菊

仙人授錦囊中有百年草本是駐顏丹人間不知寶

金聲 一首

聲字子駿嘉魚籍休寧人崇禎戊辰進士改庶
吉士以山東道御史參軍務升山東按察僉事
復起修撰有集

送雲莊師至吳門

斯文未墜地夫子獨栖遲論易真傳在從先與俗移片

雲常自遠孤鶴去何之別後時相憶雲山不可知

吳應箕 六首

應箕字次尾貴池人縣學生乙酉死于難有樓

山堂前後集

張爾公云樓山人文似陳龍川詩
白類屈正則可以飛繁霜泣鬼神

詩話先生羅九經二十一史于胸中洞悉古今興亡順逆之迹當崇禎中預慮燕都之必不能守聞者皆笑其迂而先生持論侃侃不阿也名雖不登朝籍而人材之邪正國事之得失瞭如指掌撰有熹朝忠節傳二卷兩朝剝復錄十卷留都見聞錄三卷東林本末六卷續觚不觚錄二卷其書或傳或不傳覽者可以當龜鑑矣分宜張爾公稱先生人文似陳同甫是誠知言聞先生授命處血迹至今猶存洗之不去長弘齋紹而後不多得也

歡聞曲

歡欲聞儂歌儂意忽不樂寧使歌未終不忍歡淚落

練鄉勇

舊營非無兵府亦役健壯何如更選士不戰使敵創我
聞逐賊師老弱匱轉餉馳騁梁楚交賊來不敢抗過掠
虐貧民氣驕陵主將官兵終驛騷鄉勇新跌宕古人驅
市人披靡隨所向今匪素拊循信以死長上里胥日催
督閭閻相耀誑兵怒不可邇塗膏飭資仗區區賦幾何
歲亦五千兩

悼吳門文相國

相國信公喬大庭遭遇同金閨十五載凜冽標清風一
朝邁爰立身通道反窮時方工謠詠安能久置公去國
懷明聖憂心日忡忡黯淡吳閭邑淒涼象緯中斯人不
可作世已摧華嵩

何以

何以使兵消莫如加派輟何以使賊平莫如官兵撤不見十年來請兵日不絕兵多賦亦多未見一賊滅賊去兵肆掠賊來兵不截撫軍飭啞聾鎮帥類蹙躡塘報習爲欺上下徒牽掣終年庚癸呼竭盡民膏血我皇至神武羣臣亦憂懞事勢久凌遲相戒有卷舌雖我懷區區天遠何能說

蘇州行

縛諸要離死已久墓旁宿草兼衰柳斯民三代直道存肯使端人畀虎口諸生大哭軍門前百姓呼號奮徒手須臾緹騎鳥獸奔天子之詔吾何有爾時官長汗浹背縲臣夜半單舸走民間訛言屠一城聖人憫亂殲渠首嗚呼天下幾蘇州藁葬五人名不朽

耕田苦

耕田苦耕田苦插秧三月今無雨吳中水利半人工十里九見翻車舞一車灌田畝二三一車用力人六五水田高下不相及置車銜接凡數部盡日戽水水盈寸南風復吹作乾土戮力安知晝還夜赤體相對子與父下濕上炎背欲裂前呼後和聲邪許東南歲輸四百萬那知粒粒出脛股桔槔幸有古人師不然滿原成薄鹵嗚呼耕田之芒難比數有苦不聞動官府中原鋤耰化爲兵下邑催徵尚如虎

胡甲桂 一首

甲桂字秋卿崑山人崇禎己卯副榜除南昌通判遷永州同知以道梗未赴改廣信城破被執不屈幽之別所自經死

夜泊常山

淙淙灘響上舟遲到面山容未即移更喜月明迎短櫂
吳吟細聽隔船詞

祝淵 二首

淵字開美海寧人崇禎癸酉舉人有月隱先生遺藁

詩話崇禎壬午先生伏闕申救劉公宗周時未識劉公也及公罷歸始著錄稱弟子附舟南還已而緹騎逮入詔獄寇逼京師有詔赦出者城

陷太嘗卿吳公麟徵殉之先生視含殮護其喪歸塗遇吳吉士爾熏斷一指寄其家先生為攜歸留都既下先生葬其母尋自經死會劉公絕粒公弟子王毓著自投柳橋下遺書于公謂慎無為王炎午所笑師弟之死蓋不出三句也

西湖月夜 二首

落月鱗鱗水面浮露華濃滴桂叢秋不知何處鳴柔櫓
驚起一雙雪色鷗
佛火漁燈漸寂寥推篷起坐已中宵夜來極浦灘聲急
知入西泠第幾橋

李待問 一首

待問字存我松江華亭人崇禎癸未進士乙酉八月保松江城中流矢死
卧子招飲卧龍山蓬萊閣

故人留牘少酒坐亦從容俯視湖一曲不知花幾重澄
煙天鏡水哀壑禹陵松身在蓬萊閣千巖第一峰

明詩綜卷七十三

明詩綜卷七十四

小長蘆 朱彝尊 錄

海昌 馬翬贊 緝評

黃道周 一首

道周字幼玄一字螭若漳州鎮海衛人天啓壬
戌進士改庶吉士授編修歷中允以言事鐫級
俄落職尋起官以諭德掌司經局再遷少詹事
協理府事與經筵講隨謫江西布政司都事逮
至京廷杖下詔獄遣戍福藩稱制進禮部尚書
南京既下猶督師出婺源師潰執繫故尚膳監
不屈丙戌二月死于市有大滌函書浩然咏

靜志居詩話詞臣無言責居无咎无譽之地需次待遷而已迨石齋先生入翰苑與上虞同年倪文貞公俱自任天下之重崇正去邪盡忠補過引裾折檻九死不回先生詩所云親從霹靂推車過又得滄沱自在春蓋實錄也及退而講學於杭則大滌洞天於閩則蓬萊峽少長咸集遐邇具來監史主賓琴瑟鐘磬庶幾濂維之遺風焉先生璣象之學辭義深奧後生或昧其指歸詩才亦未免蹻駁要其光燄不啻萬丈也曲周路皓月過銅山弔先生詩云道德公自重文章公自深若夫軍旅事似非公所任用違其才此百世所惋惜者

西湖忠烈祠迎送神曲

雷鼓闐子龍在野雲離披子龍血下龍上天子星無光
椒糝媮子蘭不芳靈之集子四國鴻八蹄子麟九翼凌
滄澥子拍白日踰徂征子何不得息歸休子此堂水周
子中央寒雞蒞子菖蒲羅百珍子瓊漿驂素虬子駢文
鴛柁靈車子繫靈馬執靈祛子淚盈把珮琚子灑灑晝
不足子宜宵夜維舟子鏤筵新夫君子王正年靈參差
子無後先澹耆鬚子馭青天靈何為子中悃悃

素繼咸 二首

繼咸字季通宜春人夫啓乙丑進士除行人選
授廣東道御史謫行人司副升禮部主事由員
外郎出為按察僉事累官兵部右侍郎兼副都
御史總督九江軍務有六柳堂遺集

張爾公云臨侯曾祖魯訓中成

化丙戌進士年四十退隱不仕慕陶靖節自稱六柳居士此臨侯以此名其集也

詩話侍郎處危疑之際內抑權姦外調重鎮備極苦心晚授命於燕京堪與左仲及比烈若江州之焚倉猝不能戢將士當非其本心近見野紀有誣公歸命本朝者殆出怨家之口也軍中自銘曰死事也易成事也難為嬰弗克為曰維艱張死匪先許死匪後後臣心靡他靖獻我后嗚呼父母有過則諫諫而不從則號泣旻天撻之不怨晉陽之甲豈可訓哉既被獲抵大勝關親王傳語素總督著隨行與以大官做又自銘曰大官好做大節難移成仁取義前訓是依文山袁山仰止庶幾袁山侍郎自號也

讀謝皋羽西臺慟哭記

南方有朱鳥飛中虞人弦飼以金精粒對之不下咽粒
味豈不旨不如南土泉黃冠志弗遂碧血流濺濺有客
感意氣慟哭西臺顛擊碎鐵如意悲響震巖川歸舟不
成寐髣髴語燈前嗟彼積翁羅我非雀與鳶夢炎何足
刺知己殊未然周粟不可茹箕疇曾未傳生死良非苟
忠孝各自全謝子幽明契聊以祕懷宣言罷倏不見月
明高在天

至日感懷

葭灰吹律動長安猶記衣冠拜紫鑿此日近臣新寵澤
貂裘駿馬不知寒

吳

易九首

易字日生吳江人崇禎癸未進士有東湖唱和
集

詩話啓禎之間風雅凌替古風尤置不講日生奮跡松陵誦六公詠原
本社老八哀之作是時第知卧子有起衰之功然卧子豐縟日生戍削
各有其長

六公詠

靖遠侯王忠毅公驥

抱膝當時危懷古存匡濟英雄與世徂風烈忍衰替我
思靖遠公振翻全盛世踴躍弓馬間談笑布軍勢甘涼
始出鎮肅整戎伍氣張筵斬懦將股栗衆相視一舉平
阿台河西晏亭燧麓川肆作逆公又決大計鎖甲金兜

牟照耀宮中賜長驅展方略奪險扼吭背指麾風霆奔
戰象失精銳萬古金沙江不聞漢兵至江枯石碣爛羅
拜帳下誓凱歌萬里入勞使千里出不有爪牙臣何以
正神器龍蛇壯士節蛙黽腐儒議嗚呼三征南丹書在
苗裔

威寧伯王襄敏公越

威寧熊羆姿高視氣敵萬脫略繩墨外勇智走飛電大
廷吐奇言排閭怒風旋威聲動異域壞特震所見目屬
膺帝心短袂故上殿帝曰快御史為朕將而弁所部皆
鷹騰公也身搏戰擣虛握勝策入穴虎乃困一炬紅鹽
池冰天千帳爛烽銷玉關烟雪卷陰山片轅門正高會
琵琶奏哀豔戰士挾秦姝頓使死力賤豁達籠豪英出
沒神鬼眩丈夫重勲名志豈在鐵券絕塞縣孤臣中援
何足玷慘淡黃金印零落白羽扇風塵暗不開北顧撫
長劍

新建侯王文成公守仁

文成王佐才星嶽氣突兀資神道無餘童穉挺英越訪
客絕塞游獷騎角馳射睥睨山川勢志蓋燕然磧縱橫
五十家既長稍折節空濛九華雲浩蕩南屏月以茲洞
儒宗奧義大闡斥精微續聖系餘緒贊帝業運籌羣盜
間颺焱百巢滅神龍無安翔金翅縱高掣逆旗蔽西江
妖星射金闕公時擁上流安危視縣髮隻手提天網雷

轟走飛檄指顧縛元凶九廟初安帖煌煌再造勛不得
身獻捷帝閣紛狼狐八荒置牙孽非公燁威名乾坤免
頽疊控制仗兵符中樞洵雄哲吁嗟營青蠅功大賞故
阨論道羅豪賢恬澹謝矜伐崩迫戎馬際講席每不輟
中興劇南顧元老再秉鉞六字蛟螭葬千年銅柱圻漢
儀燿百蠻灑淚思田碣威寧赫遺劔伏波愾廟謁乃知
非常人洞達神爽接我生世未遠恐懼壯猷歎戡靖竟
何人中原日流血

定襄侯郭忠武公登

郭公武定孫神駒渥注好十齡走健筆歛吸振奇藻動
徹春秋義兵法腹笥了安危異人出所以真皇造英宗
北狩初決機一何早黃塵擁翠蓋痛憤居庸道紫微爲
盪搖柱極西欲倒我公奮孤撐乃心協少保國也今有
君揮血視清昊截竄雲中城虎豹鬱相抱崩騰萬馬陣
擊衆每用少猿臂捷有神鐵甲盡穿縞楊石雄軍聲鎖
鑰資電埽撇烈天網翻槎朽地龍繞豈多三軍力遂爭
造化巧詩看橫槊賦檄倚馬上草排宕非常姿灑氣秋
空晶高詠戰場篇寂寞風流紹

少保戚公繼光

大將東南誰戚公真鷹揚雄情恣捍闔祕策揮陰陽夙
奉綦履訓更見經術詳結友傾賢豪文采殊頡頏曉達
三門流以律師所臧龍鳥追武侯衡軸通軒皇變化開

精心什伍爲鴛鴦島夷蹂南土兵氣慘不張閉營百日
練戰力虎士強疾埽溟波平受鉞總薊方計伸犁庭威
十萬環偏廂遠猷振華夏定策爲周防亭障雜星羅旌
旄蔽日光呼韓遂稽首郅支亦來王款關四十年戎馬
不敢颺伐暴貴上兵功豈必戰場竟無通侯賞坐使壯
士傷時平武略絀世亂智勇長問彼登壇者曷以恢我
疆

都督俞公大猷

文武道不殊自古惜灌絳俞公萬夫雄倜儻亦儒將讀
書當陽亞雅歌征鹵上開豁延攬真沉靜韜鈴暢公師
趙布衣手畫風雲狀貫穿十八勢方圓識所刼瑣瑣部

使者叱咤故庸妄寇憑舟山劇策恃橫海壯洪飈排烈
風壯氣噴高浪艤衝百丈城大壑千軍帳蛟宮覆絕島
鯨波赤溟漲幕府害謹言不得功罪當奇績屢見攘塞
默秉謙讓及乎雲溪役搜剔窮筭嶂遂憑死間力老謀
一摧盪封侯數則奇燕領空殊相詎多驅除才大受足
忠忼國恥今未雪元戎况飛颺豈無幽沉士屹然安危
仗蒼茫鼓鼙思駕馭必英匠

東湖雜詩 二首

百代傷心地風烟莽不收江山一弔望吳越幾春秋鴻
鴈青楓渚芙蓉白露洲霸才今寂寞何處問扁舟
禹蹟今何在蒼茫水國開山趨天目下日湧海門來笠

澤橋如帶淞江水似杯東南輸輓盡鴻鴈有餘哀
從軍行

已分沙場報國恩身經百戰滿創痕但教死去圖麟閣
不願生還入玉門

陳潛夫 一首

潛夫字玄倩仁和人崇禎丙子舉人榜名朱明
後更焉除開封推官擢監察御史江東下率妻
妾投水死

絕筆

父子生我申以嚴誨惟孝惟友曰忠與義丙子鄉舉顧
名自勵名曰孝廉庶幾無媿致身之期歲在癸未司理
開封星言視事以身許君有死無二是時兩河賊氛如
蝟衆人迴車子獨攬轡賊出河朔羣工奔避予乃渡河
擊楫而濟誓清河南以報先帝手披荆榛身禦魑魅獨
張空拳以當賊騎知有封疆九死何畏三十州邑終復
舊地維時先帝鑒予忠瘁授以巡方繡衣北莅惜也諸
姦互相牽制中樞信讒嫉予不媚聯絡要圖置之罔遂
三月撤歸可為隕涕哀哀先人一時捐棄甘旨莫承遺
書淪廢我哀方盈姦怒轉熾赫赫金吾逮予邸第圍牆
幽憂冠氛猝至匍匐歸來挈家奔避航海飄零請兵于
會召募丁男三百而已衣甲糗糒皆予自備血戰江干
二十餘次糧寡兵微於事何裨疾痛呼號徒然憤恚丙

戊五月公侯師潰區區孤軍其何能濟事不可為偷生
何貴拜別吾母以及諸弟挈吾妻妾從彭咸逝成仁取
義千古如是

張國維 一首

國維字其四東陽人天啓壬戌進士除番禺知
縣選授刑科給事中轉吏禮二科升太常少卿
以右僉都御史巡撫應天以工部侍郎總督河
道尋遷兵部尚書坐劾下獄崇禎十七年春起
原官督餉直浙後死于難

登采石贈諸將

月明橫槊倚層峰宵柝風飄和梵鐘舊是開平賈勇處

諸君努力此書庸

陳函煇 一首

函煇初名煒字木椒臨海人鄉舉後改今名更
字木叔號寒山崇禎甲戌進士除靖江知縣以
疾乞歸後自縊於天台雲峰寺有寒山集

譚梁生云木叔

真率自矢不假藻飾其詩十九贈僧信手拈出使人有才多之憾

劉伶巷

有酒宜成頌知君恥獨醒回車經巷口荷鍤信丘冥死
豈人薶得言猶婦可聽閉關當日飲想像只忘形

傅冠 一首

冠字元父進賢人天啓壬戌賜進士第二授編

修歷侍讀中允諭德祭酒少詹事詹事掌翰林院以禮部尚書兼東閣大學士進文淵閣有寶

綸樓集 陳皇士云公詩清華典瞻有唐人風

詩話傅公造格矜莊潤色閑麗去臺閣體不遠

早朝

西山爽氣接蓬萊紫殿光搖曙色開五鳳忽銜丹詔下
六龍時駕袞衣來斑聯禁地三台近樂奏鈞天萬舞迴
聖主殷憂方借箸趨陪媿乏賈生才

朱繼祚 一首

繼祚字立望莆田人萬曆己未進士改庶吉士授編修歷中允諭德庶子少詹事禮部右侍郎

進尚書入東閣後死于難

絕命辭

嗟予生子不辰逢慘禍子櫻身乾坤崩隕子陸海為塵
日星掩曜子萬象沉淪人誰無死子鴻毛泰嶽惟其所
處子殤延彭促旦夕畢命子去將安之夫妻子母子不
得相依上告蒼天子鑒此微詞雖為齏粉子甘之如飴
千秋萬古子誰其子知與化俱徂子於戲噫嘻

路振飛 一首

振飛字見白曲周人天啓乙丑進士除涇陽知縣選授四川道御史累官漕運總督右副都御史後入閩自縊于邵武山寺

除夕

仗劍以從戎自憐轉自喟黔驢欲噬虎病馬思追驥匡
濟術渺然進退兩無致漂泊海舟中面目亦堪恚天心
或垂憫俾全名與義寸衷百慮嬰竟夕不成寐雞鳴又

一年歲月悲空棄

譚梁生云柄國酬知之日乃作此
垂首喪氣之語足見不昧心入

揭重熙 一首

重熙字萬年臨川人崇禎丁丑以五經成進士

除福寧知州有蒿菴集

詩話洪武庚午應天鄉試長泰黃文史以作全場五經題領解迨天啓
甲子龍溪顏公茂猷亦作五經題騰錄官惜其才而嫌其違制止騰四
子書義三篇易義四篇以入同考官祁公彪佳取之既放榜始知為五
經也崇禎甲戌會試以知貢舉林公銜言士子有作五經全題者得俱
瞻進允之於是顏公中式禮部刊會試錄特旨命題顏公姓名於第一
人李青之前蓋異典也至十年丁丑則臨川揭公重熙十六年癸未則

嘉興譚公貞良慈谿馮公元颺武鄉趙公天麒皆以五經舉鄉會試又
萊陽宋公瑚十二年己卯亦以五經中山東鄉試此科場盛事予在明
史館分撰文苑傳擬以顏揭譚馮數公合作一傳既而放還不
果念數公皆無負科名述之詩話冀後之載筆者或有取焉

過釣臺聞晉撫蔡公訃哭之有感謝參軍遺事漫

賦

天星俄落晉陽軍路出西臺恨欲吞留得竹根如意在
化為朱鳥也招魂

曹學佺 四十二首

學佺字能始候官人萬曆乙未進士除戶部主
事移南大理寺副轉南戶部郎中出為四川右
參政浙江按察使降廣西參議遷陝西副使留
任桂平道天啓中除名為民崇禎初復官不赴

家居殉節死有石倉全集

葉進卿云能始詩刻意三百篇取材漢魏下及王韋其旨沉以

深其節紆以婉其辭清冷而曠絕其初為眾所譁久而世稱之周方叔云先生力追正始響逸開元正如皎月素波清輝自別朱鬱儀云能始天才典瞻研討精深軒輊三唐吐納漢晉貌境必似造語斯真氣峭以潔而操調極平意鍛以鍊而摘辭若樸興會所至神情獨往

能始詩以清麗為宗其送梅子庾作云明月自佳色秋鐘多遠聲程孟陽深愛之

詩話明三百年詩凡屢變洪永諸家稱極盛微嫌尚沿元習迨宣德十子一變而為晚唐成化諸公再變而為宋弘正間三變而為盛唐嘉靖初八才子四變而為初唐皇甫兄弟五變而為中唐至七才子已六變矣久之公安七變而為楊陸所趨卑下竟陵八變而枯槁幽冥風雅埽地矣獨閩粵風氣始終不易閩自十才子後惟少谷小變而高傳之外寥寥寡和若曹能始謝在杭徐惟和輩猶然十才子調也粵自五先生後惟蘭汀小變而歐楨伯黎維敬區用孺輩猶是五先生之調也能始與公安竟陵往還唱和而能矚然不滓尤人所難

雪桂軒花開得語字

桂樹山之幽予昔擇而處顧此山中雪盈枝何楚楚去歲花開時山川蜀道阻臨風祇相思馨香落何所暮春

歸林下棲息淹時序月明花正發露下清且滑飄飄入人衣採摘盈筐筥料全久要義形影盍相與隱者信可招胡媿騷人語

林守易以新舫載予同游鼓山

木蘭舟既成圖書載亦備匪資登山興疇信涉川利渚花垂岸榮沙鳥近灣戲浪洶峽門束帆側巖影墜密林屢移邨疎鐘遙傷寺微月出浦口澹然見游思

出郭別陳振狂將以暮潮解纜發之九龍

翩翩雙黃鵠矯矯雲中飛疾風一相失奄忽東西馳眷此同袍友恩義無乖疑春華不久榮秋葉乃多萎念當展行役攬涕從此辭往路何浩浩乃在瘴海涯答言別

故林與子同一時方舟夙已戒利涉臨余斯斟酌盈觴
酒各致平生私景光不相戀良駟終難追攜手念已遠
出門視多岐凡影但俯形一失俱相離幸言懷明德有
如渴與饑心爲道路樞安得不自知慎哉各努力勿負
歲暮期終當續古懽爲樂猶未遲

峽口逢陳幼孺

出門識別苦登車愁路長峽口斷地脈南北遙相望僕
夫停其綏川廣限無梁仰視浮雲馳鴻鴈同翱翔方舟
未云涉矚險先徬徨道逢相識人乃爲心所當上言長
相思下言適何方屏營周路側原野何茫茫安得盈觴
酒與子同酌嘗大義亮金石俛仰鬱中腸吾欲展此曲
列坐無高倡執手惜欲別險阻誰相將此水淺且涸離
憂方可量命不與願俱悲爲參與商羨歎雲中鵠比翼
歸故鄉

夜宿迎仙館

扶策入名山幽竒恣心賞嶺路鬱且紆投林日已曛修
渚留餘光玄廬此開敞止宿無別驂烟霞集吾黨以茲
流水喧遂致衆山響明月襲其輝盈盈照帷幌幽人有
遐夢夢到羲皇上金雞遶樹號東方色微朗晨起不及
炊浩然乃長往

喜雨同茂生作

在天有嘗度雷鳴雨可必奈何轟然聲未見涓與滴祇

言他山暝轉爲日氣逼久之豨渡河而後月離畢天澤
若王師奚爲後我及禽眠枝上起蝸涎瓦間滌秋至農
可望晨興廚克食祇恐懸河傾明朝溪路澀童子報平
沙離岸已數尺

雨中過柳陳父看杏花陳父時有樵李之游

君家住近瓦官寺金陵城中最僻地向來名作杏花邨
花開始有游人至此時結伴過君家歲歲年年成故事
花枝雖不用錢買濁酒應賒爲客醉客醉看花倒接羅
瀟瀟微雨踏成泥枝頭莫惜終零落明日東君渡浙西

棲霞寺

入山已深邃初地化爲城古塔無全影疎鐘尚舊聲佛

龕沿嶺鑿僧舍傍泉成怪昔梁江總幽居斷送迎

得張林宗書

三秋望不見此日寄來書簡略無餘字蕭條慰索居何
嫌知我少惟恨與君疎安得秦淮水能通浪蕩渠

病中思歸

累雨山寒重今春花事稀長貧那免病百好不如歸海
樹遙閩嶠江津黯燕磯故園猶有路夢裏已多違

蕪湖

客問鳩茲地蕪湖七里長春秋無義戰吳楚混封疆館
驛臨江左僑居盡洛陽猶餘赭山石仍屬古丹陽
由鴨欄至巴丘登岳陽樓

明詩總卷七十四
欲問巴蛇豕先過鬪鴨欄山名天岳固湖取洞庭寬郡
邑如沙聚帆檣若樹攢平生懷曠達今日遂游觀

山路雜興

瓦井尋何處沙溝苦欲崩斷碑猶有寺乞食即無僧山
勢開仍闔天光降遞升平生懷勝癖遇此乃飛騰

木瀆過黃伯傳宅

已失橫塘路仍逢木瀆橋夕陽湖正滿春草岸俱遙餉
客煩雞黍呼童灌藥苗由來故人宅相過意偏饒

歸宗巖道中

輿步行相半山迴徑轉幽野亭漁竝席官渡馬同舟樹
古根盤道橋崩石咽流日斜人境寂谷鳥嘒啾啾

溫陵

驛路連山路城門控海門島船秋更急沙鳥暮能喧落
葉樵蘇逕刺桐風雨邨素衣塵變盡聊以濯清源

荒口舖

地與施州近山開百里長未應能弔屈只合此投荒燒
過厓俱黑春歸草尚黃南流溪水急那更入巴鄉

登塗山絕頂

百折來峰頂三巴此地尊層城如在水裂石即爲門澗
以高逾疾松因怪得存瑤階金翠色人世已黃昏

沙溪別東生

幾夜舟中語沙溪便有程忍將離別淚一灑合州城小

雨入江暮微陽穿樹明日歸何不得歲晚事孤征
合江舟中閏十一月晦

獨坐舟中趣無人對寂寥讀書猶不覺問路便成遙江
水屢云合離魂何處招非緣今歲閏除夕更蕭蕭

臘月之朔過江津

似此嘉平月言過險惡灘春光臨路近夜雨入舟寒酒
禁開云乍梅花惜已殘迷津如可問休作隔江看

時予乍撤齋素

寄信

家居閩海上寄信兩都中道里雖然隔逶迤或一通人
生皆逆旅歸念甚兒童無計堪相慰淒其落葉風

支機石

一片支機石傳來牛女津客槎何處所卜肆已生塵較
似昆池古長從漢月新每逢秋夕裏吟眺倍相親

萬曆皇帝輓歌

庚申年七月內事

薄海聞遺詔旻天號泣多勵精時匪懈法祖算還過龍
去徒留劔鳥傷不渡河前星早有屬臣庶已謳歌

泰昌皇帝輓歌

四首

龍馭升遐日封章滿御牀施行猶令旨德意自先皇沛
若江河決俄然石火光更聞哀詔到能不重傷徨
勸進箋三上騰懽遍九垓逐臣皆召用中使盡收回貨
出昭先儉心勞集相才大工須計日久矣柏梁災
罷稅不停徵邊庭歲用增金錢溢輸輓士馬飽飛騰北

關聞天語東隅望日升那堪遽辭世倉卒治山陵
九轉神丹祕三旬帝業終春秋書法謹中外揣摩窮雨
泣將填巷攀髯或墮弓由來戮方士豈但為無功

寄關中張太守

關西遙望路漫漫泰華峰陰日夜寒長樂故宮秦輦絕
未央前殿漢鐘殘月明渭水浮三輔花發驪山繡七盤
京兆風流誰不羨時從閨閣畫眉看

送荆民部之淮陰

水色浮空下洞庭青山不斷好揚舲人過北固吳王寺
吏待南昌楚客亭別日鴈鴻俱後到望秋蒲柳已先零
但思擊筑荆卿侶長自悲歌不願醒

金陵懷古

江東列郡領丹陽鼎足三分此一方總為石頭成虎踞
不知巫峽下龍驤雲生寢廟千秋闕月照籬門幾夜長
年少風流能顧曲行人猶自說周郎

雄縣

燕南趙北易西京此地猶傳避世名河向瓦橋關外轉
樓聞鼓角地中鳴雄山警蹕留行殿亞谷降王有故城
幸沐聖明無外化宋遼何事日尋盟

武夷

丹丘遺蛻不知年方外尋真思渺然仙橘堂空碁撤局
御茶園廢竈無烟峰頭亂插虹橋板渡口難移架壑船

忽聽玉笙聲縹緲步虛已近大羅天

大田驛訪陳伯孺時伯孺客越未歸

斜陽繫馬訪幽棲古驛門前渡小溪鬼火漸明青嶂裏
人烟猶隔翠微西涼生遠樹鳴蟬斷秋老平沙落雁低
何事王孫歸未得松雲蘿月思淒淒

湖間即事

仙源迢遞杳無涯拂樹齊開十月花半壁莓苔千古色
一邨雞犬幾人家珠簾暮挂峯頭雨玉箸晴餐洞口霞
世路不堪回首望成田滄海日將斜

蜀府園中看牡丹

錦城佳麗蜀王宮春日游看別院中水自龍池分處碧

即摩訶池
華言龍也

花從魚血染來紅

蜀中牡丹以魚
血紅為第一

平臺不到林間日

曲岸時迴洞口風盡道今年當大有何妨行樂與人同

送戚山人之內黃兼簡鄧遠游明府

三月鶯聲別故山萋萋芳草照離顏春光白下無多日
夜月黃河第幾灣置驛正當賓客盛弄琴遙識使君閒
閨中易作刀頭夢珍重休過博望關

送李玄白擢淮揚運長

東南財賦困征求轉運今須第一流際海金錢輸九塞
隔江歌吹是揚州春風芍藥堂前宴夜月瓊花觀裏游
舊治如皋行部處冰絃猶自韻高秋

送茅止生北征

中原兵氣亂成羣流寇流民兩不分背水孰能韓氏陣
撼山難動岳家軍衝邊慣戰方良將側席憂居有聖君
七尺男兒三尺劍笑人毫楮立功勳

松梯

身入蒼翠中落日無人影步步踏松根不覺到前嶺

清溪朱邑宰里人也以荔支名綠扶包者見餉

三灣亭子寄山坳夾樹人家似鳥巢謾說故鄉相見好
荔支先餉綠扶包

即席贈黃姬

座客如雲待舉杯香車門外屢相催非關故意梳妝緩
自昔佳人喚夜來

彭期生一首

期生字觀民海鹽人萬曆丙辰進士歷官江西
按察副使分巡湖西守贛州城亡自縊有弱水
山人詩集

詩話先生與楊萬諸公力保孤城死之日守備楊大器潛收其尸瘞于
萬安縣之百家村仲子孫貽訪其遺骸未得久之鄉人胡樞知萬安縣
事一夕夢先生語曰遺骸在縣境君能歸之故鄉幸甚會大器之友曾
堯昂亦以狀白樞樞資遣之至海鹽家人詰其事皆合子女旋以血漬
遺骨俱沁入乃慟哭葬之
說者比於思歸之溫序焉

送秋

悲秋秋去轉堪悲枉復登臨賦楚辭遠壑水殘斜照斂
荒原煙冷朔風吹天邊白鴈迷消息月下清砧感別離
蟋蟀似能占物候寂寥一夜傷牀帷

姚奇胤

二首

奇胤字有僕錢塘人中崇禎庚辰會試癸未進士除南海知縣後死贛州之難有草玄堂詩集

秋夜

遙夜苦無寐起視明月光涼風天上來隨月入我堂披衣步前除獨立以徬徨蟋蟀既已鳴鴻鴈亦來翔感此時物變怨彼去日長生非金石姿安得恒壽康憂來不可輟慷慨吟此章

遊虎丘

高丘窈窕恣幽探席展諸天坐蔚藍聽徹疎鐘歸櫂動半塘漁火泊城南

劉同升

二首

同升字孝則吉水人祭酒應秋子崇禎丁丑賜進士第一人授修撰謫按察司知事尋復官守

贛州死

詩話劉公與楊萬諸公固守贛州或云或末陷先病卒或云城破死之傳聞異辭再考

由百花溪登玉笥山

朝看山出雲暮看雲入笥山行若無蹊恰有青童至指點絕壁間仙臺藏勝地藤枝匪易攀屐齒猶可置日午聞雞鳴巖椒啓金字出險坡漸平劃然人境異連峰涌下界撲面聳層翠因過丹竈房縱覽紫微志白花雨外明紅果林間墜晚食供芋魁晨鐺倒茶櫃坐久慵下山

跼蹐想真寄塵網詎得辭幽期偶然遂

句曲山中

地肺通幽處泉流泱泱聞山形同一已仙籍注三君衣
潤恒燒朮人來欲贈雲青童煩指點十賚拓遺文

楊廷麟

八首

廷麟字伯祥清江人崇禎辛未進士選庶吉士
授編修改職方主事軍前贊畫降調起補編修

死贛州有兼山集

詩話伯祥慨忼淋漓特
取材未純故辭多鬱轆

懷楊進士

青青東門阪上有蘿藤結願得一心人白首無磷涅周

才慎所處不敢居明哲開戶見性情羣動齊巧拙翔鳥
安其巢離獸營彼穴萬物各爲友吾生何所悅名山豈
易求耦耕效長桀

諸葛武侯祠

霸氣西南日嘗聞屢出師才爲王者佐學與古人期柏
剝一孤樹桑移八百枝中原仍帝魏遺恨史臣辭

示城兒

歸舟今夕遠西望獨沾巾骨肉天涯闊山川枕席親誦
詩思有汝好學或如人以此發深省鄉書不厭頻

別葉侍御

渾水橋邊寺北田行滕東去兩連縣桑邨古渡沙移路

茅屋人家鳥就烟江左衣冠悲楚澤淮西烽火接秦川
更聞羣盜郊原遍欲下潯陽萬里船

秋興

四首

北湖菱葉近漁家烟浦荒荒雁路斜濕鳥立沙聞社鼓
野人當戶伺田瓜月明露上蒲萄蔓夜靜風生荻蕩花
悵望故園溪外渡一聲橫篴冷蒹葭

司戶祠前一騎回邊烽未舉嫚書來漢臣獨有和戎策
楚子誰稱執政才半壁但愁軍餉乏三關不覩陣雲開
最憐風雪盧龍塞換取牙門酒一杯

疆弩將軍七萬營銀鞍金甲耀東征市兒果銳輕言戰
上相安危慎用兵海鳥自啼狼虎嶺妖星空照鳳皇城
河西百里無消息又道青山夜火明

漢家歲歲戍居延新築渾河北斗邊文學未諳鹽鐵論
公卿誰進度支錢高城寒聽菰蒲雨戰骨秋枯首藉田
壯士不聞還易水至今賓客淚潸然

萬元吉

一首

元吉字吉人南昌人天啓乙丑進士授潮州推
官補歸德再改永州入爲大理評事遷兵部主
事出知揚州府歷太僕寺卿監軍江北死贛州
游月巖謁周元公廟

中歲不聞道汎汎逐萍梗緬懷先哲型沉憂不出頰茲
來矚巖月鬼斧鑿天影尺竇洩素雲一星射瑤井物理

竟何如遐蹤忽深省元公昔幽憩萬慮悉以屏陰陽動
靜初澄心得妙領於焉瞻遺廟百世尚嚴整冥心無極
前衣露遍清冷

黎遂球 五首

遂球字美周番禺人天啓丁卯舉鄉試死贛州

之難有蓮鬚閣詩集

萬茂先云美周思以才靈學以才化識以才通語以才妙讀其詩覺有靈光異

采在目光離合間

徐巨源云萬曆五十年無詩濫于王李侏于素徐

纖於鍾譚乃今獨見美周讀之如春風駘蕩夏雲崔嵬如坐百花雜聽

簫韶美人劍客翻動左右 陳伯璣云美周

近體稍傷艷麗五言擬古諸作高于今人

詩話宋季吳月泉主社賦春日田園雜興羅公福擅場得羅一縑七篋

五十矢墨五笏元季饒介之主席賦醉樵歌張仲簡擅場得黃金一餅

崇禎初鄭進士超宗未第時主會賦黃牡丹詩者百人美周居第一時

號黃牡丹狀元三事本太平佳話而皆出於百六之秋公福肥遜仲簡

遂初美周則授命虔州三君子各自靖尤為美談美周詩不為

格律所縛大都以才勝徐巨源謂太白以後一人未免過實矣

花下歌

生平不事求神仙願上東海求仙船童男童女各三千
教之歌舞及管絃逍遙行樂二十年遂令婚配同力田
可得萬人馳九邊大雪國恥銘燕然老夫鬚眉圖凌烟
結屋花國臨酒泉名儒俠客列四筵等閒詩賦人爭傳
乞得一字十萬錢

歡聞變歌

鏡破面自圓誰能破儂面天地縱反覆儂亦與歡見

懊惱歌

歡初戀儂時夜夜門前立今日歡棄儂對人不敢泣

少年行

年少傳聞十二州報人讎盡轉多讎經行不用變名姓
醉卧胡姬賣酒樓

山中

寂寂春眠野夢多酒醒那識夜如何山中慣不聞雞犬
只是天明鳥便歌

梁朝鐘 三首

朝鐘字未央廣州順德人崇禎己卯舉人有喻

園集

憶檀溪

半月襄城路山川滿目迷後聞都護語知己渡檀溪遙
憶歸鞭處微沙沒馬蹄叩門抱長慟忍入邵陵西

將出皖留別楊六符沈乃功唐聖俞徐譽星諸先
生時子將入襄歸粵

船傍垂楊別緒生烟含春樹鴈歸聲羣公縞帶遺吳錦
幕府青絲唱渭城幾樹烏啼趨夏口何時馬首望西京
江南江北如相憶千里高樓待月明

題画兼寄友人

灞陵山色動秋風開遍黃花九月中每憶江南帶霜樹
夕陽疎葉渡頭紅

張家玉 三首

家玉字玄子東莞人崇禎癸未進士改庶吉士
有遙夜怨軍中遺橐

錄別和李定夫

鴛鴦戲清池兩兩常相倚羽翼臨當乖風波中道起相對尚難知何況萬餘里來親去者疎毋爲貴君子子懷抱區區君諒執高誼

塗中感舊

燈下妖姬月下筵風流曾汎太湖船如今回首神京隔腸斷西風憶往年

閨思

竹林啼鳥遍春暉何事行人尚未歸惆悵夜來牕月白夢魂飛不到金微

陳子壯二首

子壯字集生南海人萬曆己未賜進士第三授編修天啓末削籍崇禎初以原官起用歷諭德詹事升禮部右侍郎進尚書家居殉難有雲淙集

耕籍禮成恭紀

天子親行畝微臣相秩宗清塵傳蹕靜瑞靄出郊濃高柳喧靈鵲華芝結袞龍普天應有兆九穀在三農

春日侍諸父泛舟桃花塢

欲作郊居即灑西紅芳十里勝金堤不知南漢千年苑更入東風幾曲溪負局客來籬犬吠和歌誰伴乳鶯啼清時羣從多游好豈是秦人世外迷

陳邦彥

三首

邦彥字會斌廣州順德人貢生以兵保清遠師
潰死于難有巖野集

詩話巖野僻居嶺南與黎美周歐子建陳喬生以文章聲氣遙應復社
卒殺身以成仁其南上草自序云商聲曼歌慨當以慷亦各言其志也
又臨命歌云書生漫談兵時哉
不我與君子誦其詩而悲之

南雄道中逢霍階生

病後無顏色秋深有遠行漸於鄉土隔翻遣故人驚歸
思珠江道前塗白下城嶺梅殊未發貽贈若為情

重別葉公士

大雅風斯遠知音世所稀他山情獨切兩地夢俱飛楚
塞丹楓暗吳門翠岫微祇憑文賦在萬里未相違

雨夜宿吳潮泗江閣

去家五百里相過重鄉音客路樽前語江流檻外心風
連三峽暗雲隱二禺深莫作登樓賦柴扉尚可尋

明詩綜卷七十四

明詩綜卷七十五

小長蘆 朱彝尊 錄

緝評

楊廷樞 三首

廷樞字維斗吳縣人崇禎庚午鄉試第一有古

柏軒詩集

徐孝若云維斗吾黨之李元禮房伯武也見義當前突怒無畏近讀其遺詩人之云亡遂成千古之憾悲夫

靜志居詩話先生倡應社於吳中評隲五經文字張溥天如朱隗雲子主易楊彝子常顧夢麟麟士主詩周銓簡臣周鍾介生主春秋張采受先王啓榮惠常主禮記而先生與嘉善錢梅彥林主書後與復社幾社合領解之後聲譽日重門下著錄者二千人詩雖游好然如吉光孔翠片羽皆足為珍且勝於服習竟陵派者多矣晚歲巖居忽罹維繫其舟中遺書云廷樞幼讀聖賢之書長懷忠孝之志為孝廉者一十五載生世間者五十三年作士林鄉黨之規模肩綱常名教之重任惜時命之不猶未登朝而食祿值中原之有難遂蒙禍以捐生其年則丁亥之歲其月則孟夏之中方隱遯於山阿忽陷身於羅網時遭其變命付于天雖突如其來如亦已知之久矣生平所學至此方覺快然千古為昭到

底終為不沒但因報國無能懷志未展終是人臣未竟之事尚孤累朝
所受之恩留此血衣以俟異日舟中矢志不能盡言末書四月二十八
日復系以十絕
句文多不錄

訛聞

世塗繒繳多結廬在窮谷神悴嗟樊雉心危怯庖鹿耳
目異驚喜早暮更禍福先憂累親朋失色觀奴僕共傷
衰德鳳應賦知命鵬且當飲醇酒勿向詹尹卜

舟中

野岸官橋路已蕪寒江暮雨客舟孤烟中帆影時開落
霧裏山光半有無宿鳥驚心猶未下哀猿引臂自相呼
淒其古渡黃昏候一點漁燈起荻蘆

閨情

寂寞空閨怨夜長征人何事未還鄉不知牆外誰家笛

十二樓中盡斷腸

陳子龍

三十七首

子龍字人中更字卧子青浦人崇禎丁丑進士
除惠州推官丁憂服除補紹興舉廉卓天下第
一升吏部主事改兵科給事中有白雲草廬居

湘真閣諸豪

朱雲子云卧子五古初尚漢魏中學三謝近相見
輒諷太白諸篇其才性故與相近七古直兼高岑

李頎之風軌視長安帝京更進一格五律清婉七律格清氣老秀亮澹
逸絕句雄麗由其才大靡所不有寬然有餘 魏楚白云五古學漢魏
者大抵轉關必在大謝唐之曲江明之北地皆是如此黃門亦祖其說
能於質悶之中兼以俊秀信是雅宗七古弘正間皆仿浣花唯青蓮學
者絕少黃門起而一振其風昔人詩芙蓉露下落楊柳月中疎黃門近
體佳境往往相似 錢瞻百云大樽當詩學榛蕪之餘力闢正始一時
宗尚遂使羣才蔚起與弘正比隆摧廓振興之功斯為極矣 繆天自
云剥窮而反否極而復先徵於聲音之道卧子當楚人眾咻之餘力追

正始允矣人豪 龔蘅圃云卧子定幾社六子之作目曰壬申文選東鄉艾南英千子貽書誚之蓋學前後七子之詩而并學其文千子非之是也若詩當公安竟陵之後雅音漸亡曼聲竝作大樽力返於正翦其榛蕪棘荆驅其狐狸獠貉廓清之功詎可藉口七子流派并攢譏及焉子嘗購得甌甄洞集係先生手自施鉛自越江渡錢塘往返點筆無虛日卷尾必以朱墨識之於吳明卿若是矧古賢吟藁乎今人手放翁誠齋詩讀未終卷便毀唐人為不足學多見其不知量已

詩話王李教衰公安之派浸廣竟陵之燄頓興一時好異者講張為幻關中文太青倡堅偽離奇之言致刪改三百篇之章句山陰王季重寄謔浪笑傲之體幾不免綠衣蒼鶻之儀容如帝釋既遠脩羅藥叉交起搏戰日輪就暝鴟子鴉母四野羣飛卧子張以太陰之弓射以枉矢腰鼓百面破盡蒼蠅蟋蟀之聲其功不可泯也觀其與李宋二子選明人詩自序略云一篇之收互為諷詠一韻之疑互相推論攬其色矣必準繩以觀其體符其格矣必吟誦以求其音協其調矣必淵思以研其旨於是郊廟之詩肅以雖朝廷之詩宏以亮贈答之詩溫以遠山藪之詩深以遠刺譏之詩微以顯哀悼之詩愴以深使聞其音而知其德省其辭而推其志先生之論詩知所本矣

曜靈 六章并序

曜靈天子遇旱而憂省獄減刑雨以時降詩人

美之也

曜靈維陽杲杲麗天爰自東作火見于昏天之薦瘥蘊隆如焚皇曰予冀方邦畿所安廢我來牟兆民孔艱早之始盛維塵冥冥早既太甚百卉具零豈降自天胡德非馨曾是有象恭曾是有讒慝曾是有詭隨曾是有培克

爰命宗伯大雩孔明爰命徹侯于郊于宗以爾幣玉及爾斯牲方社既周山川用享振古率育胡邁予不寧巍巍薊丘維君宅之翼翼皇心維天繹之禮莫不展來饗來格膳宰既徹鏞鼓既釋凡百君子勗爾無斃皇曰司寇維刑世重世輕朕聖姦宄或愆于平悍陽驕

驕憂我黎氓乃清岸獄乃釋累囚肆赦時夏或歌且謳
倬彼燕山出雲油油終朝彌野旣舒旣柔旣霑旣優田
畷語語樂我士女以育我稷黍皇王布惠天錫純嘏

仲夏直左掖門送彞仲南歸

金塘迴素波中有雙鴛鴦託身在清禁和鳴君子躬顧
此同林鳥孤翼忽南翔生平志慷慨何事獨難忘本爲
四海人豈得常相將丈夫重知己萬里同一鄉黽勉效
貞亮德輝在巖廊莫憂青蠅多和璧貴善藏執手不能
語悵矣結中腸

雜詩 六首

日夕登高臺馳目窮千里衆星燦雲間經緯誰能理神

哉玉衡運天樞無終始上有瓊瑤宮紫皇日端委我欲
乘飛鸞銜書碧雲裏聲殷塗逾遐心長情何已懷中五
色石相見徒磊磊

山椒微風發薄暮遲佳人顏陽澹林表素月生河津佇
立懷往路時宴多苦辛君家青雲樓瑤華豔當春皋蘭
亦有芳欲寄良無因歡愛豈足重要使恩誼申浮雲誠
易阻白璧終見珍

至道無相非未流乖心迹高懷苟不亮執誼日以積賢
隨貴同用愚與賤交役騰名自有階投讒豈無隙營營
棘上蠅可以攜金石履純思寡尤超方鮮奇策毀譽苟
未忘顧影慙跼蹐

尚口自有窮捫舌豈我欺伊予昧機變率性不自知遇
物皆裏言當險若履夷于己固弗慎安望人保持俯仰
生平內常與悔相隨沉默苦不早壯盛忽若馳世人貴
形迹君子敬威儀臧否聖所誠南容真我師

自聞麥秀歌纏繇亂心曲四野起重陰白日一何速親
朋與我違豺虎來相逐皓皓凝河水蕭蕭落山木行吟
空自知獨立傷游目逝川何時還頽光能再燭詎惜紅
顏變所悲韶景蹙豈無帝女靈願就愚公谷

墓門有惡木鷓鴣巢其顛同茲雨露潤不與百卉妍性
質固自殊大造安能遷我行適見之三日醒未痊利斧
雖在手斬伐無此權去去保芳潔痲然思過愆

魏楚白云
大樽雜詩

融鑄晉魏自成一
家得力又在景陽

賦得浣紗石

越紗出機中翦向春風裏皎若秦川雲飄揚隨淥水佳
人臨淺瀨無言空徙倚不惜紅顏勞素絲誰為理斂衣
入中林澄江皓千里青苔日夜生沉思竟難已

苦雨

洩雲屯層嶺密霧瀾空林南山發殷雷北郭滯愁霖紅
泉落虛壁淶水漲遙潯危條度飛鷗宿莽聚鳴禽桃英
蕩華色麥穗悲陸沉天畢騁所好屏翳日相侵徘徊華
軒下彷彿碧山岑昏墊蕩下土沉冥符道心側想零雨
篇空懷梁父吟

江東有凡鳥自名為禿鶯食魚徒滿吭毛羽終可羞其
或所立渚鷗鷺必遠投何來一蒼鷹鐵翮黃金眸不作
摩天飛下集滄江流側身與鶯伍比翼相遨遊末流安
可居貴賤各自求所以老鶴心傲然橫高秋

小車行

小車班班黃塵晚夫為推婦為輓出門何所之青青者
榆療吾飢願得樂土共哺糜風吹黃蒿望見牆宇中有
主人當飼汝叩門無久室無釜躑躅空巷淚如雨

桃源夜遇鄭超宗落第還維揚

相逢班馬鳴三月出王京秉燭黃河岸悲歌下相城風

雲雙闕暗花柳半江明突兀金臺上知君最不平

交河

烏啼征馬動曙色散滹沱海氣通三島天風靜九河沙
平邊草斷日澹塞雲多百里無烟火空邨空自過

襄陽

江漢西陲重荆襄南紀雄諸侯悲峴首耆舊失隆中燧
色通秦塞妖星下楚宮不知大隄女何處舞春風

高寓公書來詢予近况予適從石齋先生築講壇
于大滌山留連竟日遂書此報之

三山迷漢使更起白雲壇環珮天風滿旌旗海日殘草
侵羣帝靜月度九霄寒惆悵乘鸞者焚香獨夜闌

廬居

行遯山河改歸來松菊荒尚餘三畝宅無復萬家旁
死煩宗祝偷生媿國殤但依親隴在含笑此高岡

錢塘東望有感

清溪東下大江迴立馬層厓極望哀曉日四明霞氣重
春潮三浙浪雲開禹陵風雨思王會越國山川出霸才
依舊謝公攜屐處紅泉碧樹待人來

晚秋雜興

太行東出擁神京古塞秋風右北平笙鶴已辭滄海使
貂蟬初撤羽林兵清霜玉沼芙蓉苑旭日金鋪翡翠城
魚鑰時傳宣召急侍臣通籍在承明

晚渡錢塘

吳山越岫隔中流簫鼓平明青翰舟萬里晴江開曉郭
千帆春草送芳洲桃花欲落潮先至鶯語初聞露未收
何事西陵常問渡不堪獨上望京樓

送吳巒穉司李桂林

翡翠巢邊匹馬過千盤桂嶺鬱嵯峨南浮灘水啼猿滿
北望君山落鴈多巒穉官閒能作賦漢廷恩近憶鳴珂
愁心獨繫張平子欲寄瑯玕奈遠何

送張玉筍中丞擢河道少司空隨召陞見

舊京開府靜牙璋詔領河堤入未央周室保釐分邾鄆
漢家底績念宣房九天星宿穿秦塞萬里梯航走冀方

為語至尊南顧日不堪重問海陵倉

錢瞻百云雲間七律多從
豔入大樽味特深厚而詞

更娟
秀

吳越武肅王祠二十韻

羅平妖鳥集唐室已顛連草草羣雄事紛紛割據年斗
牛占王氣屠販出豪賢地屈孫劉勢形支江海邊爪牙
多健勇參佐集神仙本奉中原朔時分屬國天錦城開
邸第大木擁旌旃受冊三樓上歌風駟馬前自從納土
後終見舉宗遷青蓋方朝洛丹書改賜田金輿何日去
玉盃不曾還守墓新恩重荒祠舊德傳冕旒皆壯麗子
姓特緜聯晚樹騰鼯鼠虛簷響杜鵑崇功銘版碣遺恨
滿山川異代還祠廟當年入管絃竇融應貴寵張軌共
周旋錫禮何妨盛王侯豈易捐誰言脫屣便不見誓書
堅宋室諸陵在南枝更可憐

邊詞 二首

大同女兒顏如花十五學得箏琵琶莫向中宵彈一曲
清霜明月盡思家

八城亦是古遼西大纛高牙萬馬齊壯士錦衣行樂地
十年無夢到春閨

從軍行

彎弓獨上李陵臺極目燕支秋色來磧路西迴三萬里
青天遙挂白龍堆

督亢

燕南趙北起秋風亂後斜陽沒故宮此地輿圖原不小
能藏七首入關中

侯岐曾 一首

岐曾字雍瞻蘇州嘉定人通政峒曾弟縣學生
援例入國子監以陳子龍事牽連執至松江遇
害門人私謚曰文節先生

望湖亭口占

俯檻即湖陰沿流望隔潯峰開三面色人雜五方音簫
鼓龍祠鬧松楸馬脊深悠然喧寂理飄泊一觀心

劉曙 二首

曙字公旦別字穉圭長洲人崇禎癸未進士除

南昌知縣未赴居父憂坐事械至江寧死于市
有節必居橐

乙酉八月十四夜匿影農家夢楊維斗作

襍被短簷下月華靜窺帳子來入我夢顏色耿相向為
別亦已久不問別來狀互言白髮新慷慨復悽愴分袂
還踟躕欹枕轉惆悵緬思定交日總角氣方壯文酒多
奇懷圭璧有微尚中原今陸沉吾道未淪喪亂離憶朋
儔雞鳴不能忘乃知君與友一義相摩盪浩歌絕命辭
與子共酬唱所敦在宿昔存沒總依傍相期泰華顛千
秋訊無恙

烹悟泉因懷王克仲

相依謀已定相望意仍違清夢勞明月孤吟繞翠微分
泉甘苦共脫帽往來稀漸欲尋山徑秋風一款扉

顧咸正 五首

咸正字端木崑山人崇禎癸酉舉人除延安推
官後死于難

詩話端木文康曾孫與弟咸建咸受子天遠天遴父子兄弟五人後先
授命可謂不媿相門此外江陵有孫同敞別山嘉善有子棟仲馭而家
叔祖成都府同知大定君永均與烈風中勁草比節使
後之作史者仿新唐書宰相世系撰表亦足以生色矣

登華山

倚杖高臺萬里秋山川元氣共沉浮金神法象三千界
玉女明妝十二樓并鉞參旗皆北拱濁河清渭自東流
愁看殺氣關中滿獨立南峰最上頭

落葉

亭皋秋色乍淒其葉葉枝枝悵別離靜院翻風人倦後
小牕敲雨夢驚時飄零漢殿哀蟬曲憔悴陳宮玉樹詩
却恐尊前歌舞罷故園楊柳又依依

沈山子云落葉詩題顧氏
昆友竝作而端木熨帖特

為擅
場

上方巖

層層白雲堆石屋架其上烏雀靜不喧半空人語響

猢猻愁

人心險于山平地覆車馬猢猻亦何愁愁爾登山者

新製藍布袍口號

鐵甲縱橫日綈袍寂寞時難將故鄉淚低向袖邊垂

夏完淳

十一首

完淳字存古松江華亭人考功郎允彞子有玉

樊集南冠草

鍾廣漢云陳大樽選明詩存古年纔十餘爾而宋

矣迨十五從軍十七授命磨盾草檄不異老生宿儒信異稟也

詩話存古南陽知二江夏無雙東駿從軍死為毅魄其大哀一賦足敵蘭成昔終童未聞善賦汪疇不見能文方之古人殆難其匹

仿古

月出西南樓流光入幽室盈盈十五女綽約好顏色素
手響金徽一彈三太息激楚變清商悲惋難自抑本以
待遠人所遇非疇昔熏風蕩羅綺卧懷行旅客夢中迷
遠道疇能辨南北飛禽習習還疑是君行跡征雲無歸
期彷徨淚盈臆

秋懷

五首

祝融避炎陸金天肅秋駕玄蟬響高樹鷓鴣鳴深榭豐
草承露零朱華冒風榭蟋蟀變東榮素河轉西野自媿
蒲柳姿奄忽從物化久視多所悲疇能竟長夜

涼風何瑟瑟吹我游子顏歷歷江上林流蟬鳴其間浮
雲西南征一去何時還駕舟凌洪波杖策窮崇山君子
不遑息小人豫以閒感激在溝壑敢念徒旅艱中夜起
百憂勞人獨長歎

秋色從西來風物自淒緊金飈辭炎暉玉露戒商軫鷓
鴣薄暮鳴幽蘭望秋隕零落在一時榮華若朝菌高從
巢父棲下與壺公飲靜觀百歲間無名以為準

耿耿秋夜光雲中覩靈匹漢陰無報章河陽有棄軛霧
帚結雲環瓊珮何歷歷佳期匪綺節妙會乃涼夕微露
鮮玉枝輕飈動雕翼餘光歛欲馳流景逝已迫黃姑九
秋期婺女三光隔彷彿靈駕回參差空夜織

愁人不能寐羅帳含月光涼風吹芙蓉習習生金塘絡
緯鳴參差瓊露凝玄霜柔條日以勁瑤草不復芳盛衰
各有時憂來浩無方玄髮忽改白使我身世忘

魏禹平云
存古秋懷

諸作非謝非
韓游衍自得

精衛

惠風蕩芳樹有鳥鳴中林尾長羽翼短銜石隨浮沉崇
山日以高滄海日以深既無凌風姿延頸振哀音辛苦
徒自力慷慨誰為心惜哉志不申道遠固難任滔滔東
逝波勞勞成古今

楊柳怨

東風初度春江曲大堤花草參差綠昨宵烟雨盡傷心
今日鶯花空滿目有客扁舟迴自傷一江春色半垂楊
始知啼鳥皆牽恨不是征人亦斷腸

秋夜感懷

登樓迷北望沙草沒寒汀月涌長江白雲連大海青征
鴻非故國橫笛起新亭無限悲歌意茫茫帝子靈

送杜于皇歸郢

分手金陵道相逢倍黯然鸞啼楊柳岸人在木蘭船客

路三千里征衣十二年計程歸夏口明月兩回圓

寶帶橋

連天芳草青極浦獨揚舲歸鴈舟前落愁人夢裏聽花
光明曉霧波影亂春星欲訪靈威穴孤帆入洞庭

葉尚高 一首

尚高字而立樂清人温州府學生

詩話而立兵後佯狂幅中大袖行於市太守見而執之賦詩云云釋之不問丁亥二月上丁攜水一杯采芹一束乘太守未釋奠哭于孔子之庭曰吾師乎吾師乎縱泰山之已頽曾林放之不如乎太守至怒繫之獄迨五月四日語獄卒曰詰朝屈大夫沉湘之日吾其死夫俾具湯沐至明自經而立詩無存市上所賦特游戲耳然亦孟榮計有功輩所當錄者

上太守

北風袖大惹寒涼惱亂温州刺史腸何似蜉蝣易生死

得全楚楚好衣裳

林 奎 一首

奎字子埜候官人崇禎癸未進士除海寧知縣
家居死事有恥齋集

為鄆德都画竹

所南之蘭無土恥齋之竹無根想見百千年後熒熒紙
上血痕

郭符甲 一首

符甲字輔伯晉江人崇禎癸未進士戰沒葬海

島中

詩話顧漢石懸首錢塘六月無蠅郭輔伯戰死海滄五百人尸糜爛而四體不腐忠義之足以感天地萬物也

題寓園松徑

長風何處起清響落層湍忽聽晴空雨翻飛午院寒蒼
鱗移漢殿鐵幹老秦官即此開三徑徘徊盡日看

祁幼文云春容

大雅

廊露 二首

露字湛若南海縣學生有嶠雅

汪洋自恣以寫其牢騷

不平之志或時清淡緩態效東晉人風旨所至輒傾一座至為詩則憂天憫人主文譎諫雖小雅之怨誹離騷之忠愛無以尚之 梁芝五云湛若上元跨馬衝南海黃令行慍令怒拘之微吟曰騎驢適值華陰令失馬還同塞上翁及廣州城陷猶倚柱鼓琴為兵所刃抱琴死錦衣葉君贖之嵇侍中之衣房公之馬宜為世所重也 沈山子云湛若詩鏤金葉玉以雕琢為工其不經意處時臻大雅詩話湛若工諸體書學使者試士以恭寬信敏惠發題湛若制義五比用大小篆八分行草書于卷學使者大怪之然不罪也居恒以才略自負見海內多事因學騎射跨馬出門衝縣令頭踰令怒申文學使者除其名將加以桎梏乃亡命之廣西遍尋鬼門銅柱舊蹟游于岑藍胡侯

槃五姓土司為猺女執兵符者雲韞孃書記歸撰赤雅一編紀其山川風土儀物及女君天姬隊歌舞戰陣之制家蓄藏真墨蹟享帚千金素問業於香山何閣老吾騶閣老見而愛翫不已湛若分手脫贈既而大悔挈舟抵香山升閣老之堂欲自挂梁上閣老亟卷還之又蓄二琴一曰南風宋理宗宮中物一曰綠綺臺唐武德年製明康陵御前所彈也出入必與二琴俱廣州城破湛若抱琴死綠綺臺為老兵所得以鬻於市歸善葉錦衣解百金贖歸至今存其家詩曰嶠雅手書開雕極精楷予嘗見其駢體文亦佳

虞山謁舜祠

荒服垂衣日三苗格命年烏耘千畝籍龍御九疑烟蒲
坂征雲外蒼梧落照邊何人撫瑤瑟離恨隔湘川

采石

牛渚青天月長縣供奉祠如何今夕酒不共昔人持高
詠誰能似扁舟從所之溯洄殊未已言折楚江蘼

瞿式耜 一首

式耜字起田嘗熟人萬曆丙辰進士授永豐知
縣調江陵選戶科給事中以右僉都御史巡撫
廣西死于難有

集

詩話瞿公生長華門屏游閒之習自臨八桂盡瘁行間既繫獄中與江陵張公同敬悲歌酬和互作草書筆飛墨舞聯為行看子往嘗見之于吳下所謂鼎鑊甘如飴者

遊虞帝祠次金道隱韻

祠宇蕭疎迴絕塵孤峰隨意著閑人窺雲應傍巢松鶴

破浪終同入釜鱗茶盃酒鐺全部史風篙月槩一江春

予與子暇道隱扁舟泛月而歸却憐嶺嶠曾無恙便託荒巖老此身
陸水修云向隅之語入肝脾

吳鍾巒一首

鍾巒字巒穉武進人崇禎甲戌進士除長興知

縣謫紹興府照磨升桂林推官

大庾道中

亂離何地度年華老至仍憐去路賒共指此心猶似水
相逢多說已無家關山寂寞行人少雲樹蒼黃落日斜
逆旅挑燈愁獨寐夢思應繞赤城霞

李向中一首

向中字豹韋號立齋鍾祥人崇禎庚辰進士除
長興知縣調秀水升車駕主事未任補職方舟
山下被執不屈死

題旅舍

日言紀卷十五
雲外平林東郡天邊落日西峰悲涼此夕何夕燈火黃昏店中

周世臣 一首

世臣字穎侯宜興人崇禎庚辰進士除漢川知縣以建言革職補永平府簡較升興化推官

游仙詩

園丘列奇樹北海生神芝翡翠曜瓊圃潛鱗戲瑤池飛泉供漱齒白石為療飢姮娥降洪響宓妃領其頤隨烟上三島飄風凌九疑持此傲下士投簪來遠期

余鷗翔 一首

鷗翔字唱若號誕北辰溪人天啓乙丑進士除

金谿知縣調遂溪入為戶部主事歷員外郎以布政參議守徽寧道轉山東遷浙江按察副使調山東

聞劉念臺先生被放

皇威方震虢忠愛此時心抗疏回天苦憂時去國深雲從歸路暗日為逐臣陰慘澹春明水秋蟬寂未吟

見好然不類楚人流派

萬曰吉 五首

曰吉字允康黃岡人崇禎庚辰進士崑山知縣有東有堂詩四集

塢影園

半壁依青嶂千峰落翠微草堂冰雪路山鬼薜蘿衣斷
塔仍栖鴿荒岡亦采薇中原方格鬪坐卧掩柴扉

寒食

東郊朝日靜北郭暮烟遲燕不巢新幕花猶戀故枝嬾
投分肉社羞逐鬪雞兒屏絕人間事縣田弔子推

送吾無上人返廬山

萬里秋聲急青楓古渡平潯陽潮自落楚岸月孤明破
衲飢寒去芒屨雨雪行爐峰遙在望惠遠定相迎

哭艾千子

膚髮臣無恙朝廷事已非斯文將墜地先死亦知機遺
業驚殊域孤魂戀舊畿酸風吹劒水丹旄暮雲飛

謝客

角里先生小築居蕭然衾枕半牀書閉門覓句江湖外
濯足招魂雨雪餘卯酒動思千日醉辰瓜準擬一犁鉏
五陵公子多裘馬同學何人問草廬

朱日升一首

日升字君旭淮安山陽人崇禎癸未進士

弔宋叟

天高木落起憂思秋士悲歌正此時何處靈均尋舊蹟
臨風三歎薦江蘼

李之椿一首

之椿字大生如皋人天啓壬戌進士除行人遷

吏部主事歷官尚寶司卿有指樹園集

朱雲子云
徂徠五律

工秀起句尤用意如春曉淨江天青山入画船
家家楊柳青車馬不曾停真不減唐人風致

虎丘弔五人墓

亂賊兒孫擁安危呼吸爭五人能就死衆正始俱生矯
逆原非詔拳兇不為名忠魂今尚在時映夕霞明

項禹揆 一首

禹揆字子昆秀水縣學生與李之椿同遇害

和定齋陳子閉關

聞道牆東客翛然避竹陰泥封清濁酒箋輟短長吟沮
溺耕焉耦求羊徑轉深看君同臭味可許獨幽尋

畦 本一首

本字允立丹陽人明永子縣學生坐事死有務

菴集

和袁景文白燕詩

瑤海春深舊壘非水雲漠漠望依稀雪中曳縷飄紅去
月上窺簾傳粉歸莫以處堂怡玉羽豈將巢幕語烏衣
故宮別殿今何向冷落梨花影共飛

張煌言 二首

煌言字玄箸鄞人崇禎壬午舉人

詩話文信國至燕元世祖命具供帳如上賓既戮于柴市臨朝歎曰文
丞相好男子不肯為吾用殺之誠可惜也興朝之主待亡國之臣其怒
若是聞公就執制府趙清獻公待之以禮慰勸再三卒以不屈含笑受
刑殮而葬之雷峰之右至今有包麥飯而祭者清獻之寬仁足以頌矣

樅陽謠 二首

八尺風帆百丈牽
縱陽湖裏去如烟
江南米價秋來長
喜殺桐艚賣稻船

沿湖下網蕩湖船
網內纖鱗錦樣鮮
燈火湖光兒女笑
魚秧種得不須田

黃周星 二首

周星字九烟上元人
育於湘潭周氏中
崇禎庚辰進士除戶部主事
疏請復姓晚居湖州有芻

狗齋集

詩話九烟晚變名曰黃人字曰略似又號圃菴又曰汰沃主人又曰笑蒼道人布衣素冠寒暑不易人有一言不合輒嫚罵嘗賦詩云高山流水詩千軸明月清風酒一船借問阿誰堪作伴美人才子與神仙年七十忽感愴于懷仰天歎曰喜而今不可以死乎自撰墓志作解脫吟十二章與妻孥訣取酒縱飲盡一斗大醉自沉于水時五月五日也又仁和陳叟繼新居於禾晚節納石子懷中赴龍淵寺門潭中死均不失為

申徒狄徐衍一流

天台

勝蹟天台路移情入宵冥
亂泉秋後寺絕壁古時亭
櫛葉岸多濕蓮花峰更青
白雲吾語汝且向石梁停

秋日與杜子過高座寺登雨花臺

被髮何時下大荒
河山舉目共淒涼
客來古寺談秋雨
天為幽人駐夕陽
去國屈原終婞直
無家李白只佯狂
百年多少憑高淚
每到西風灑幾行

錢梅 一首

梅字彥林嘉善人
崇禎癸酉中順天鄉試
以薦除職方主事進郎中
坐事死於市有白門集

右俞

古云彥林貴公子性好結客復社未舉之先吳有應社彥林實倡之平生與卧子交最深卒同其禍仲子不識女壻夏存古咸有神童之目存古年十七慷慨就死與婦翁白首同歸尤世所難也

詩話吾鄉科第之盛數嘉善錢氏撫軍相國二房聯華接武相國有仲馭撫軍有彥林後先以死勤事賢子弟固自難得

七夕獄中作

對泣南冠度綺宵
江鄉千里客愁遙
雙星若識人間事
也定淒然罷鵲橋

徐爾穀 一首

爾穀字似之嘉興人國子監生坐事被逮死白門有画水草堂詩橐

贈顏先生

萋萋芳草望中迷
落盡棠梨水拍隄
誰向扁舟憐別客

白雲相送板橋西

明詩綜卷七十五

明詩綜卷七十六

小長蘆 朱彝尊 錄

南屏 顧之珽 緝評

孫 淳 三首

淳字孟樸嘉興府學生有梅館居存草

張天如云孟樸諸詩

去短集善 萬茂先云孟樸築梅館於南潯間以詩自娛所作清微婉逸庶幾風騷之遺

靜志居詩話詩流結社自宋元以來代有之迨明慶曆間白門再會稱極盛矣至于文社始天啓甲子合吳郡金沙樵李僅十有一人張溥天

如張采來章楊廷樞維斗楊爨子常顧夢麟麟士朱隗雲子王啓榮惠常周銓簡臣周鍾介生吳昌時來之錢梅彥林分主五經文字之選而

效奔走以襄厥事者嘉興府學生孫淳孟樸也是曰應社當其始取友尚隘而來之彥林謀推大之訖於四海於是有廣應社貴池劉城伯宗

吳應箕次尾涇縣萬應隆道吉蕪湖沈士柱崑銅宣城沈壽民者生成來會聲氣之孚先自應社始也崇禎之初嘉魚熊開元宰吳江進諸生

而講藝於時孟樸里居結吳翽扶九吳允夏去盈沈應瑞聖符等肇舉復社於時雲間有幾社浙西有聞社江北有南社江西有則社又有歷

明詩綜卷七十六

亭席社崑陽雲簪社而吳門別有羽朋社匡社武林有讀書社山左有大社僉會于吳統合于復社復社始于戊辰成于己巳其盟書曰學不殖將落毋蹈匪彝毋讀非聖書毋違老成人毋矜厥長毋以辯言亂政毋干進喪乃身嗣今以往犯者小用諫大者擯僉曰諾是役也孟樸渡淮泗歷齊魯以達于京師賢大夫士必審擇而定於契然後進之于社故天如之言曰忘其身惟取友是急義不辭難而千里必應三年之間若無孟樸則其道幾廢蓋先後大會者三復社之名動朝野孟樸勞居多然而斂怨深矣十年正月蘇州民陸文聲疏陳風俗之弊皆原於士子庶吉士張溥知臨川縣事張采倡立復社以亂天下思陵下提督學政御史倪元珙察覈倪公言諸生誦法孔子引其徒譚經講學互相切劘文必先正品必賢良實非樹黨文聲以私憾妄訐宜罪閣臣以公蒙飾降光祿寺錄事蘇州推官周之夔者與溥同年舉進士初亦入社至是希閣臣意墨經詣闕復訐奏溥等樹黨挾持案久未結讒言罔極至有草檄以聲復社十罪者大略謂派則婁東吳下雲間學則天如維斗卧子上搖國柄下亂羣情行殊八俊三君迹近八關五鬼外乎黨者雖房杜不足言事業異吾盟者雖屈宋不足言文章或呼學究智囊或號行舟太保傳檄則星馳電發宴會則酒池肉林所云行舟傳檄殆指孟樸言之至十五年御史金毓峒給事中姜燾各上疏白其事始奉旨朝廷不以語言文字罪人復社一案準注銷後福藩稱制阮大鍼怨戾寅秋南國諸生顧杲等一百四十人之具防亂公揭也日思報復爰有王實鼎東南利孔久湮復社渠魁聚斂一疏大鍼語馬士英云孔門弟子三千而維斗等聚徒至萬不反何待至欲陳兵于江以為防禦心知無

玉峰埭下別天如

經過便聽埭鈴聲誰解消魂此日情客為譚深催別暮
船隨潮便報帆輕偶因懷友重憑檻悔不看山再入城
二十餘年芳草寺隔查相望水盈盈

悲婁吟哭天如也

偶因文事立雞壇不料浮言啓百端生死幾人知痛哭
風波惟我共艱難北門學士虛華屋南郭先生為撫棺
不負當年風雨夜竝將松柏厲餘寒

倪君益以燈字索詩

是事而意在盡殺復社之主盟者時崑銅暨宜興陳貞慧定生輩皆就逮繫獄桐城錢秉鐙宣城沈壽民亡命得脫假令王師下江南少緩

則復社諸君難乎免于白馬之禍矣自昔黨錮之傳列于後漢之書月泉之社附諸亡宋之籍故錄其詩綴于崇禎之末

画船前月醉西陵曾羨新歌續采菱歸後但逢漁火出
夢中猶認六橋燈

吳 翻 四首

翻字扶九吳江縣學貢生有升恒堂集

計甫草云明季黨禍

社事初不相蒙至於亡國之罪尤與應社復社諸君不相及不可不辨也社事之興不過諸生文字之會自朝宁視之無異童子之陳俎豆習禮儀為嬉戲耳且明祖諸生之禁甚嚴非若漢唐宋之太學生得羣聚京師伏闕百十人橫議存亡大計也漢唐黨禍其人身為大官仕于朝次亦為郡國守相若二張雖仕不達維斗彥林終老孝廉東之婦翁吳君不惜破產以勸復社與子常麟士孟樸皆頽然老諸生豈漢唐宋黨人之比哉

詩話扶九居吳江之荻塘藉祖父之貲會文結客與孫孟樸最厚倡為復社既而思合天下英才之文甄綜之孟樸請行出白金二十鎰家穀二百斛以資孟樸閱歲羣彥胥來大會于吳郡舉凡應社匡社幾社聞社南社則社席社盡合于復社論其文為國表雖太倉二張主之實引次尾扶九相助當其時烏程温相君有子求入社扶九堅持不可於是乎有徐懷丹之檄陸文聲之疏繼以周之夔之彈事又繼以王實鼎之

飛章而復社禍機既發扶九亦日在憂患中家居論斷歷代史分為存信存疑二部又聚明人集三千七百家欲輯典故成一家言皆未果遺書經盜劫散佚殆盡有子南齡子女壻也僅存復社同人姓氏一冊出自扶九手書爰錄其副按籍以求諸先生之詩蓋千百之什一爾

懷熊壁菴師在靈巖

朝衣脫去更翛然慧業生來即解禪縱說江南風景好
舊人慵對李龜年

憶王汝成吹笛

夜半清歌遶苑屏更兼羌笛動人聽吳郎一去春無主
誰壓新聲入洞庭

南京懷古

戎車已見借包茅十四樓成話樂郊一自燕山開御苑
月明南內鎖蠨蛸

哭孫孝廉君昌

一生漁獵是忠經
白袷從軍袒受刑
江左風流消歇盡
更無名士哭新亭

楊 繇 一首

繇字子常嘗熟儒學生
張受先云甲子冬與天如同過唐市問子常盧麟士館焉遂定應社

約敘年子常居長 計甫草 云子常麟士經營社事最先

建溪

艇子飄搖下青移
對岸峰一灘溪一曲千里石千重
鴻鴈應難到鳥鷺亦少逢
深潭與急峽曾說有蛟龍

顧夢麟 二首

夢麟字麟士太倉州人有織簾居詩集

追和陶南村雜詩 二首

野曠逢人少兵殘避地多
辛勤知稼穡游釣託烟波
草漫烏犍卧門開白鳥過
社餘分一醉斜日下庭柯
漫隱烏皮几行呼鶴髮翁
輞川舟上下灤水屋西東
襖穿花底笭箬挂竹中
無人問名姓祇道武陵同

朱 隗 七首

隗字雲子長洲人有咫聞齋橐
史稱大江之南五湖之間其人輕心

晉人言吳音妖而浮故其人巧而少信昔奪于秦中服于齊今昧于楚此其徵也雲子能自立一洗輕心少信之恥

詩話雲子際鍾譚盛行之日唱酬吳下遙應南風然其論詩有云詩貴淵源風旨不取蹈襲形模漢魏未嘗規摹三百篇盛唐未嘗規摹漢魏今且拘拘習其聲音笑貌何為者邪又贈陳玉立長歌云譬如韓昌黎杜少陵文章無一字無來路何曾入蹊徑尚平腐也說不驚人不休也說橫空盤硬語堪歎世人疲驢瘦馬逐隊行及至跨險騰空鞭不去五十年前不知天下幾人僵死中原白雪中後此還為楚風誤則於景陵

非中心誠服可知且盛稱卧子之作而其已
作第留意於中晚不可與聞修元歎等齒也

絡緯

恤緯誠何念勞勞警客眠響清當雨後意苦在秋前疎
火瓜棚夜凉河鴈影天食苗非爾志籬落興翛然

天長苦雨

時館地與高
郵湖相近

縱橫野水斷人行荒綠推牕一望平
傷舍秧齊聞擊鼓北方敲
鼓插秧隔籬花短見移檠
天涯弟妹連宵夢澤國風烟幾
日晴酒醒空堂凉不寐怒雷驅雨入湖聲

月艇歸帆

入浦風漸微蒲帆不須落秋光何處多烟月溪邊閣

虎丘春眺

桃花水漲沒桃溪掩映紅橋碧草齊萬樹垂楊深雨裏
邨南邨北鶉鳩啼

佛惠河亭

榕葉蕭蕭下水亭瓦燈殘燄伴寒星荒藤苦竹聲相切
却作湘江夜雨聽

戲贈滄叟

誰憐湖海老漁師殺賊能工盾鼻辭二十年前還憶得
酒香深院颺紅兒

西湖偶作

故園籬豆綻凉風酒薄衣單古寺中正恐秋聲聽不得
清霜禁殺絡絲蟲

沈士柱

五首

士柱字崑銅蕪湖縣學生有土音集

周穎侯云崑銅故宮辭思致縣

邈忠見乎辭情懷悱怛義形於色得風人勸戒之旨動人望古之思

九日和穎侯

何處登高去鄒陽尚繫囚異鄉逢九日深殿送三秋鴈
晚飛無定醬寒咽不流西風吹夢好湖海一扁舟

次韻荅嚴仍叔見贈

相逢遲暮舊知名子墨無煩介客卿句欲驚人同謝朓
身非處士雪樊英眼看箸覺籌難借心近棊嫌局不平
越石扶風迎乍歇雞聲漸次曉牕明

次青陽孫王二子寄山峒韻

畹蘭徑菊舊柴門記得君來共酒尊豈意馬能將鹿指
遂教象亦被蛇吞禁中黃霸書空掩塞外班超筆尚存
長夜漫漫何日旦從君叩角再微論

前故宮詞 二首

三百年恩總未酬宸居何意卧羈囚先皇製就琉璃瓦
還與孤臣作枕頭

武英舊殿月輪西袞袞朝臣待漏齊十九人今無別夢
冬青枝上鷓鴣啼

劉

城

七首

城字伯宗貴池人有嶧桐集

詩話伯宗次尾足稱貴池二妙才氣亦相敵也

筥篋引

公無渡河河北賊多賊多猶可兵多奈何

折楊柳歌

三度入孟津漢兒顏色少惟有楊柳枝不改前年好

秋懷

秋雲日以薄秋夜日以長秋露日以白秋草日以黃此
時秋士悲耿耿不能忘豈無同心人飄零非故鄉蒼蒼
蒹葭遠乃在天一方欲往心煩紆漸我車帷裳

招安歌

花闌小票百十紙縣縣纏纏免死字宛宛轉轉到寒壘
賊首坐笑冷牙齒有人附耳言如此上坐回嗔色作喜

大言爾歸報總理吾今賣劍買牛乞貸死願受冠裳住
城市

羣盜

羣盜尚如此江城未可依健兒身手劣祈父爪牙非鼯
鼠能中飽飛鴻恒苦飢從來比管樂今欲泣牛衣

追恨

黃屋何曾樂憂勞十七春布袍常服御煖閣累咨詢貴
近無撓法狂愚得上陳聖明成覆敗誤國總諸臣

九華雜詩

祇園高處不勝寒四望悲風獨立難我以輕衫當晝解
僧言殘雪昨宵乾木皮覆屋冬偏好竹葉編籬卧亦安

忽覩金光爍初地滇南一堦日中看

沈壽民 三首

壽民字省生宣城人縣學生舉賢良方正有剩

菴詩藁

詩話崇禎丙子有詔舉賢良方正於是巡撫應天都御史張公國維以宣城沈徵君壽民應詔既入都適宣大總督楊嗣昌奪情起兵部尚書徵君抗疏劾之其略云嗣昌居喪起復業一年矣君命莫可委即應躬歷戎行滅寇朝食奈何安坐司馬之堂支吾朝夕以一十二萬方張之師二百八十餘萬咸集之餉顧不及鋒而用鼓行以前使餉日以虧師或解體因循釀禍嗣昌斯時雖屈首服丁汝夔之刑束身死王洽之獄竟何益哉又疏云嗣昌既不能躬履行間曲狗熊文燦之說兩人專欲主撫奉天子之聲靈以邀賊一紙之認帖即撫局果成而辱國損威已不可贖而况其未必也流寇之禍蔓延七省肆毒十餘年矣屠戮之慘振古未聞甚乃悖逆滔天擅驚陵寢凡為臣子疇弗痛心嗣昌統一十二萬之師不為不武運二百八十餘萬之餉不為不充整旅以往何兌弗催俾賊力極勢窮面縛與櫬猶應宣布皇威律以無赦而後昭上恩德以宥之夫如是而撫可成也今者漫無翦治頓事姑容招之不來強而後可毋乃既墮勦之功而復乖撫之術乎雖復遠寬三歲之限更累

數年之民正恐盪蕩無期主憂彌切臣不知所終矣通政使張紹先以其言危切借字數溢額沮勿封進徵君復隳括兩疏之綱領上之疏入留中不報乃投劾歸漳海黃公道周歎曰此何等事在朝者不言而草野言之昔真希元在朝一月而封事三十六上吾豈可遠媿希元近慙沈子隨拜疏爭之由是臺諫則何公楷錢公增林公蘭友成公勇詞臣則劉公同升趙公士春次第章俱上南兵部尚書范公景文復率南九卿具公疏思陵震怒削范公籍解成公赴訊餘俱鐫謫無得免者諸公之廷諍實徵君倡之阮大鍼既得志將出緹騎逮徵君乃變姓名攜家匿金華山中久之還故里終老不出學者私謚曰貞文先生與徵君共舉者知穀城縣事阮公之鈿為張獻忠所害贈太僕少卿

荅戴子

獨坐寡懽惊起步庭南端悠然何所矚吾自愛吾山故人遺我書贈我古錦篇清辭響哀玉抗意天雲間世事總戚促擾擾不得閒甘陵房與周南北部相捐如何程夫子名共蜀朔傳有道秉昭曠感昔心憮然三復三歎息歸犁東岡田

訪姜如農城北

石公嚴譴後又見荷戈新曠代留遺直殘山待老臣龍
歸天上馭環賜夢中身生死昭亭路鄉園別自春

嘉靖中石御史

金以諫止醮詞謫戍宣州後百餘年公繼至

扇歸輿父

是物珍吾笥三年怯未書筆因王粲閣風想謝安餘秋
浦愁後夜宣州好月初思君不可見題罷付江魚

梅朗中 五首

朗中字朗三宣城縣學生有書帶園集

侯朝宗云朗三采六

代之華標三唐之製長歌短律胥臻精妙施尚白云朗三善詩古文辭兼及書画又好獎才彥斂衆美以萃其身乃年不逮四十而摧折悲夫王貽上云宛陵諸梅若禹金之宏博季豹之高古子馬之俊逸率能守高曾之矩矱風雅之緒

月泊惠山同定生匏如

帆落山就暝沿流入湖口烟火兩岸居曖曖蔭榆柳際
寺轉幽豁左右帶園阜稍覺風滿林愛此月盈手任真
率已暢賞心遂成偶續遊諒能期良覲容再有且復共
徘徊無令坐搔首

雜詠

芳蘭生道旁擊者豈不衆朝寒風中花欲貽美人種美
人有遐心國香亦何用管蒯誠微物得時則為重

折楊柳

楊柳多情樹秦樓與灞橋參差籠淺黛蹀躞綰長條春
夢從來慣離魂自此銷年年攀折盡不待到秋潮

高樓月

月色皎如此秋光滿夜清高樓動遐思二十四闌明木
葉洞庭下蒹葭霜露生鳴琴復起坐河漢漸縱橫

西湖七夕秦家樓和定生

天路收新雨明湖映淺流他鄉當此夕遠夢寄高樓穆
穆金波暗蕭蕭白苧秋如何綵雲合空聽鳳簫愁

周立勳 五首

立勳字勒卣松江華亭縣學生

張受先云勒卣工愁善恨下語如九曲明珠耐

人尋索

詩話松江舊有十八子社唐文恪董文敏及吾鄉馮祭酒與焉崇禎中勒卣偕陳夏諸公倡幾社首事僅六人以詩古文辭相砥礪今所傳壬申文選是已陳夏皆以名節著惟勒卣早天聞其遇社中人意態殊落落而人自有欲親之誠時穀城方閣老四長守松江數與幾社諸子周

旋而尤敬愛勒卣人或問之答曰勒卣一往有雋氣不屑作酒肉貴人第其詩文恒以慨歎出之慮其人不壽耳歲己卯就試金陵質素清羸寓伎館伎聞貢院搥鼓促之起勒卣尚堅卧也未幾遂客死卧子哭以詩云松柏西陵路萑蒲北里花春風夜臺路玉勒向誰家宋轅文亦有詩云翠羽明珠擁莫愁君家顧曲舊風流一時腸斷人何處風雨蕭條燕子樓又云山陽玉笛異時情天問靈均意不平縱使未堪軒冕貴何妨白髮老書生數日後忽夢勒卣至曰君詩固佳胡不曰縱使未堪丘壑老何妨白髮困諸生轅文覺而異之為位佛祠祭焉

詠懷

東登泰山巔纍纍見城郭秋風吹平原牛羊下寒澤呂
尚本陰謀漁釣竟所託神明啓遠疆後世資經略遭逢
良有時志士固窮約飄蓬西南征浮雲散林薄悲哉大
國風田橫不可作

過隨州

東國隨為大何年更築城地連唐蔡古水散湫澹平暮

竹依猿狖荒臺立旆旌從來作賦客愁絕爲南征

首春思歸

新烟舊雨歎沉淪又過江城十日春楊柳漸看能贈別
故園芳草未歸人

傷春 二首

平池曲巷古祠東幾樹桃花落晚風明日殷勤樽酒後
春光已過別離中

白燕墳前載酒過幾人同唱柳枝歌莫愁一夜花如雪
搖落春心自此多

于奕正 二首

奕正初名繼魯字司直宛平儒學生有樸草

詩話司直好古嘗集天下金石志雖未詳核亦足繼
東陽王象之書其詩南學于楚然燕趙之風骨尚存

太古洞

太古闕秋光幽窅不可拾我欲探其奧呼僧列炬入蝙蝠
觸烟驚已墜復飛集直下若睂井雖寒不能濕石乳
挂四圍彷彿百怪立閱歷迷近遠但視光所及石罅伏
深潭僧云龍所蟄靜聽恍有聲習習涼飈吸心動欲引
還炬短石逾澀附壁苔染身足滑力不給一綫逗天青
黃葉飛正急

經甘羅城

是柘甘羅宅淮流萬古經說行因趙地拜賜自秦庭斷
碣摩新蘚餘錢帶舊青維舟上荒阜岸草晝冥冥

米壽都 一首

壽都字吉土宛平人貢生沐陽知縣

冀州河漲紀事

天意驕河伯羣情厭徙薪謾言沉玉事只有望洋人凡
席蹇流苻階渠理釣緡慣來鷗與鶩相傍若為鄰

崔丹 一首

丹字道母更名子忠字開子又字青蚓順天府

學生

詩話道母以画見知華亭董尚書益自重家最貧有以金帛請者既不納有二女皆善画萊陽宋司臬玉叔曾示子許旌陽移居圖鬼物青紅備諸詭異之狀幾與龔聖與爭能匪近日画家所及也甲申寇變走近郊匿陶穴中不出遂餓而死復社一二集道母均與焉先後名字不同

送僧歸滇南

兵戈前路息萬里憶慈雲冬嶺春花豔秋江暑氣熏到
時書少鴈去日夢隨君最是悲涼處遐荒收夕曛

陳梁 一首

梁字則梁海鹽人有覓園集

詩話則梁好讀異書索異解與董思白交不效其書與鄒臣虎交不效其画詩文詞必已出寧晦不庸晚歲隱居僧服茹葷治生壙於郭外結屋三楹覆之語其友曰此毫社遺意也題其柱云此佛自來耽米汁至今孤冢有梅花又云天下何思何慮老僧不見不聞暇輒召客縱飲壙前亦達士也

壽王叟

竹隱居士不入市手易一編三截韋顛毛下垂不復理
于埒有雞闌有豕牀頭有酒清且旨對竹銜杯聊自喜
田舍翁願已足矣人生大都百年耳叟今四百四十幾

甲子壯夫之顏小兒齒南宮注名從此始

祁駿佳 一首

駿佳字季超紹興山陰人

詩話先生有道之士然頗嗜奇余嘗造其居去冠弛帶用墨紗束額當前兩分之而以金綫圍其文問之則曰此季布髡鬚遺意也值其將營生壙置棺一椁一咸以不材木為之厚不盈寸其形類積椁去棺七寸予不省其製先生語予云吾嘗惡世之為棺蓋下而兩和者思有以易之聞松脂入地千年成琥珀吾納諸椁之內棺之外不材之木取其速朽木既朽而吾長寢于琥珀之中不愉快乎坐有滑稽者笑曰假若遇巨人防風僑如巨無霸握琥珀以為扇墜則先生亦不得安寢矣先生嘿然先生弟孝廉多佳字止祥書畫摹董文敏逼真名亦注復社然不如先生小楷之絕倫

秋日送顧茂倫

胥江九月鯉魚風有客乘潮下浙東家傍三高祠下住到門楓葉恰新紅

潘一桂 一首

一桂字木公丹徒人

渡淮寄李沮修

一辭明月綠蘿灣獨向平原淺草間別子幾番今有淚渡淮三日不逢山人隨征斂荒春事風促兵戈冷抱關開筴讀君臨別句連篇繾綣不能刪

朱雲子云胸臆流出情事自然不假粉飾而氣蘊特厚

錢邦芑 一首

邦芑字開少丹徒儒學生晚為僧號大錯

歸田詩

春至雨露滋百草俱萌茁荷鋤周田塍土膏解枯澀汨

汨水泉動蠕蠕蚯蚓出呼童治犁鋤催耕不遑息天時
一相違事倍功猶嗇君子既勞心小人應食力俯仰天
地間貴賤咸有職一人肆遊惰羣情能無惻飽暖不知
恥恐有災患及自非終歲勤豐稔安可必

顧杲一首

杲字子方無錫人有悟秋草堂詩集

詩話崇禎戊寅南國諸生百四十人具防亂公揭請逐閹黨阮大鍼子
方實居其首有云杲等讀聖人之書明討賊之義事出公論言與憤俱
但知為國除姦不惜以身賈禍大鍼飲恨刺骨而東林復社之讎在必
報矣大鍼名在東林點將錄號沒遮欄而閩人周之夔亦注名復社第
一集阮露刃以殺東林周反戈以攻復社君子擇交不可
不慎於始也子方楊柳枝一詞若似乎為阮周而作者

楊柳枝詞

滾滾飛花下夕陽從前春事一時傷東皇縱欲重收拾

惱殺霑泥更不香

孫臨二首

臨字克咸一字武公桐城貢生有楚水吟肆雅
我悵二集大略齋橐

東甌曉發

際曉連檣挂席同不煩邪許喚篙工沙頭宿鳥飛逾白
霧裏殘燈颭不紅半嶺霞殘茅店雨一江潮響石門風
閒雲片片藏孤峽不鎖寒流日向東

括蒼夜思

春山花盡月初升水上南雲夜氣澄客夢不離桃葉渡
即歸已是白頭僧

徐世溥 三首

世溥字巨源新建人有榆溪詩鈔

宋牧仲云巨源詩陶汰間有未淨而

取材博用意遠不規規于漢魏唐宋諸家而每窺其堂奧

擬古

迴車駕言邁言之京與雒故人多通顯未知今厚薄鏡
中顏盛衰一身難自度何況他人心與我本自各遠游
值佳辰興感倍蕭索君子不竭交且歸肆行樂

詠懷

標榜列廚俊黨議謂由茲吾聞元凱目已在高辛時重
華去我久何由就敝辭獨斷舉良族黜幽禦魅魍穆穆
虞帝庭安得不垂衣

赤崦道中

前山雨欲來空翠遠相接樹樹作秋聲不辨何枝葉

沈自炳 二首

自炳字君晦吳江人恩貢生

詩話君晦昆友以詞翰聞江左倚聲尤擅場晚保鄉里師
潰從彭咸之所居其近體過於穠縟蓋具體温李韓韋者

車遙遙篇

車遙遙兮馬閑閑壯士去兮入秦關春風暮兮秋草殘
追思君子淚潺湲

豫章行

頽曦有重旦缺魄當再圓落花還更蕊衰草可復鮮陰
陽有消長於人獨不然奄忽辭親友永訣入九泉九泉

杳冥冥長夜何漫漫感念痛生人千秋難復還

張致中 一首

致中字性符淮安山陽人以經明行修舉未授
官卒其友私謚恭孝先生有省尹文集

詩話復社初興君與白受藻素先方能權異若率同郡諸子應之而君為之領袖以尊經博古是尚家雖貧儲藏鼎彝碑版之文頗富有子弢字力臣棄諸生不就試工六書躬歷焦山水滌手拓瘞鶴銘而考證之又入秦謁唐昭陵遍覽從葬諸王公表碣潛瑋斷石必三復而聯綴成篇疑者闕之顧處士寧人曾請其寫音學五書字樣銀木以行惜未得其吟橐附于君詩之末也

聞蛩次方巽若韻

蛩以鳴秋擅先秋亦自鳴未須嫌寂寞已足助淒清振
羽爾何意關心各有情從茲風露下愁逐草根生

馮延年 二首

延年字千秋秀水人貢生有秋月菴橐

詩話千秋吾里具區祭酒之孫愛西湖之勝築快雪堂于湖滸千秋遂入籍錢塘鄉試已卯副榜貢入北雍崇禎庚辰人或勸之就選人入仕版見時事不可為歸隱秋月菴為復社耆宿與子首川父子並著錄亦僅事云

秋月菴春暮作

秋月菴居春也豪藥苗菜甲滿西皋三點五點社後雨
欲落未落園中桃時光忽憶萼菜滑采摘不厭輕舟勞
一枝栖息吾意足乍可物外違塵躔

簡張天生

共誰聽雨夜連牀獨擁殘書快雪堂雲斂鷺巢從樹出
風來蕩葉倍花香平湖小舫空秋月斷墻孤峰愛夕陽
吾欲糟丘營此老待君同酌水仙王

徐樹丕 一首

樹丕字武子長洲人縣學生有埋菴集

詩話先生兵革之後屏居郊西布衣藿食視世事等浮雲其八分書高古近駕文彭遠師梁鶴詩亦專以唐人為師

寄徐亦史廣文于馬馱沙

欲寄廣文札慚無司業錢每懷江上路時詠月中篇

王百

穀徵君曾有看月馬馱沙篇

署冷真忘世官清得晏眠馬馱衣帶水皎皎

練同懸

朱明鎬 一首

明鎬字昭芑太倉州儒學生

甲申悲憤詩

銅馬連羣壓帝畿百官猶是殿廷非東華父老吞聲哭

誰斲桐棺覆玉衣

劉應期 一首

應期字瑞當慈溪貢生有遺詩

黃太沖云崇禎間吳下倡復社以網羅天下士

主之者張受先天如浙東馮留仙鄴仙枹鼓相應皆喜容接後進然裁量人物纖芥之惡有所不容遂為朝野清議之寄於時慈水劉瑞當初與姜思睿端愚齊名稱姜劉繼與馮文偉玄度齊名又稱劉馮晚年矢志發為詩文僻思奧句頗類董圭峰

潔菴

有室曰潔菴舊址臨河築敗壁抵雨風短垣障水陸其
右路通門小徑恣往復牕紙耐晴明庭卉間紅綠主人
無一長自言但不俗旁堆書百家中挂画一幅盡掃肥
膩具制器尚匏竹或銜酒一杯或鼓琴一曲呼兒撰几
杖對客任歌哭閉戶判十年寤寐矢弗告

李世熊 三首

世熊字元仲寧化人有寒支集

詩話元仲鏤錯見長澄瀟不足昔人謂陸士衡胸中書太多能痛割捨乃佳元仲亦犯此症句若幽栖云浮雲揮袖起明月入懷多病中作云懷人惟故鬼作客在

和陶擬古

茫茫宇宙內美者長不完
玄豹裁為裘紫貂製為冠
豈以文采姿助人為容顏
所以養志者蓬累甘抱關
胸中傲儻意微見于毫端
趙璧寧肯獻隋珠詎輕彈
尚父雖鷹揚不如鍛羽鸞
編茅茹木實聊以禦飢寒

和陶飲酒

鳩能知天雨鵲能知天風
嗟哉此微禽託命風雨中
用志久不分遂與造物通
吾亦晚有聞天道猶張弓

病懷

薄雲片片過溪樓
門掩殘燈照獨愁
南海寄書求益智
北堂無地種忘憂
藤枝刺月風簾細
竹篠流光露葉稠
白草黃沙千萬里
看人屠狗盡封侯

陳許廷 一首

許廷字靈茂海鹽儒學生

詩話文學枕藉漢書熟精文選詩不多作遠佻巧之音

崔貞姑廟

野塘臨練浦祠屋類團焦
近社初聞鼓開門側近橋
靈衣金粉蝕烟帳蕙蘭銷
欲采蘋花薦迴波一水遙

姚宗昌

二首

宗昌字瑞初長洲縣學生有鳴蟹草

蘭皋社集詩

總轡顧中原余馬安所向逍遙丘澤間山水恣清放殷
勤二三子霽心敦夙尚彼美思榛苓高言共酬唱中坐
起徘徊予懷自惻愴藻景倏已馳餘光空蕩漾衰鳳鳴
秋秋柔音交蔚暢合并不忍別久要詎宜曠行樂且及
時君看明月望

蕪萋亭

亭失蕪萋舊符開赤伏真敗軍無隊伍燎竈有君臣慘
澹中興事徘徊弔古人河水仍在望客淚但沾巾

張

澤

一首

澤字草臣吳江儒學士

旨齋

日色到門靜幽懷如可尋鳥翻秋樹影雨隔夜燈深一
月坐無事空齋閑此心寒琴與殘菊相對助微吟

舒忠謹

一首

忠謹字魯直新建人中崇禎庚午鄉試

鴻門宴

示玦既太拙舞劍亦可怪何如將玉斗多酌勸樊噲

姚

澣

一首

澣字北若秀水人官生

詩話北若為尚書善長之孫年樂於取友盡收質庫所有私錢載酒徵歌大會復社同人于秦淮河上幾二千人聚其文為國門廣業時阮集之填燕子箋傳奇盛行于白門是日勾隊未有演此者

秦淮即事

柳岸花溪澹泞天恣攜紅袖放燈船
梨園子弟覘人意
隊隊停歌燕子箋

莊祖誼 二首

祖誼字宜穉成都人

詩話全蜀入復社者八人宜穉詩名特著惜流傳無幾

除夕

春仗先期試綵鞭
斗杓入夜就新躔
遊當海徼逢殘歲
家寄江城又一年
梅信差池寒尚勒
雁程迢遞暖難前

泥塗甲子容衰賤不問南山種豆田

初春吳門送友還蜀

解手東風思惘然
君還巴蜀我之燕
聲蜚白下新留草
酒載丹陽欲滿船
四百八灘三月上
九千餘路一尊前
文心各藉江山助
探得奚囊字字傳

范世鑑 一首

世鑑字子明桐城人縣學生崇禎間卒

謁朱司農墓

司農墓枕碧峰
芴老盡蕭蕭
舊白楊長以一坏存
漢土此間千載自桐鄉
古碑斑駁雲猶護
怪石欹傾樹欲僵
我讀簡編如覲面
又攜椒酒拜斜陽

趙相如 二首

相如字又漢桐城儒學生有載園詩藁

潘蜀藻云又漢文震

蕩捍闔奇氣鋒出詩多忠君愛國憂時閔俗之作諷喻婉約怨而不怒有詞人之風

招寶山觀海

江山積旅吟芳思入寒碧一葉窮東南歲盡不知客乘
潮胡所之遠挂蛟門席朔風揚怒波海天勢欲割遙空
不可支更上高高石回眄諸峰雲已絕飛鳥迹太虛夫
何心晝夜此潮汐成連既已逝清響將誰格而我撫孤
絃長嘯弄烟隙

寄張恢生

頻年失意氣難平聽爾悲歌百感盈朝議偶然行薦舉

家貧終不脫諸生春來寒雨喧金斗江上秋風到石城
典盡鸛鷄還命醉中原何日罷談兵

嚴啓隆 一首

啓隆字爾泰崇禎中烏程縣學生有巔軫子澹

軒集

破錢行

握錢入酒肆四錢乃當一問子何為然人事非夙昔舊
錢如糞土新錢重圭璧客持新錢來形濫不殊錫輪廓
無復周脆劣不容拭顧惟陽九終物力告衰息小人競
刀錐君子感星曆

下文闕

趙韓 一首

韓字退之平湖人國子監生有攬言蔗言

鄧尉山寺

青天太湖水落日洞庭灣嶺色開孤寺濤聲入萬山當時隱君子或未去人間際此梅梢月銜杯共往還

葛雲芝 二首

雲芝字瑞五崑山人有卧龍山人集

詠懷

落日照柴荆攜杖肆遐矚偶逢樵採人班荆序心曲依依農圃言歷歷過原陸放懷任所之前路阻修木欣然輒返駕疎燈出茅屋童子方候門翛然通心目不知阮嗣宗何以常慟哭

和陳皇士掩關詩

我亦蓬蒿滿經時謝客過簷前栖鳥靜檻外落花多暮雨停行藥香風識采荷元龍高卧處矯首問如何

周茂藻 一首

茂藻字子潔吳縣儒學生有蛩吟草

桐川賦別諸子

來時楊柳正依依去日春歸花盡飛為客淹留思獨苦故人消息意多違江淹賦別憐春草謝朓登山對落暉從此桐川一回首自拚霜鬢且忘機

夏 緇 二首

緇字雪子嘉善儒學生有西泠維摩孤望三集

夜過伏波營

蠻雲瘴雨滿山頭
火照殘碑識馬侯
笑問書生緣底事
夜深驅馬向辰州

南中曲

黔府新編十二歌
南音如梵亦吹螺
侍兒記拍分銀豆
小史登場換畫鞞

趙士喆 十一首

士喆字伯濬掖縣人貢生鄉人私謚文潛先生

有東山詩史

陳皇士云伯濬詩歌忠愛懇切大類子美

詩話伯濬偕山左大社以應復社捍鄉里之牧圉效信國之集句嘗削囊縱談天下事思上之朝見陳啓新用事恥之不果顛沛終老殆臨江節士扶風豪士之流

辛巳道中作 并序

予以九月二十七日登臨淄縣文昌閣讀其碑
見房喬事悵然有懷明日至柳橋北度又折而
西過大清河十月朔抵武定州留三日西至德
平返歸武定人以鐵鎖絙門不容過客云是夜
賊入商河矣

崇禎歲辛巳季秋廿有五束裝自濰陽出門時嚮午再
宿到臨淄憑高獨弔古霸氣若烟銷宮觀淪禾黍房公
王佐才名冠天策府匪邁雲雷際詎免沉環堵濱蒲斥
鹵鄉雨後稀行旅四顧何蕭條白日低寒浦鶴鶴嘯空
邨稅駕知何所泥深疲馬陷主僕同辛苦行行至武定

目擊多酸楚巷陌骨如霜居民面如土父老爲我言前
歲遭屠鹵流移猶未歸尺籍多虛伍如何米豆徵敲扑
猛于虎齊城七十二南下連鄒魯詩書絃誦地大半驚
桴鼓已亂不能勦未亂不能撫商河脣齒邑羣盜恣吞
咀袖手仍閉門深媿州名武子聞父老言孤憤填胸腑
聖主憫時艱憂勤同二祖破格欲掄材每爲權姦阻養
成狐鼠驕坐使英雄腐紛紛肉食流緩急何足數父老
欲有言涕泗零如雨驅馬舍之去不敢深相語登萊幸
小康暫且歸林圃壯心猶未下時作聞雞舞

擬遼宮詞 十首

四樓城闕盡東開正旦諸王面面來磔犬燒羊捫乳酒

君臣團坐笑傳杯

扈蹕宵征敢冒寒侍兒應作健兒看錦鞞貂額戎裝好
不用郎當舞袖寬

李氏螟蛉已贅疣石郎反噬更添愁官家笑得漁人利
天外飛來十六州

海淀樓臺第一層到來六月失炎蒸金盤雪蕩成虛設
何事天廚更進冰

全晉輿圖屬大遼太宗新莅紫宸朝漢家禮樂真堪羨
從此坤儀改姓蕭

名家妃主度關山馬上貂裘淚不乾莫訝鶯花邊地少
遼陽更比范陽寒

女伴從軍萬里還自言曾到玉門關赫連臺上秋雲卷
遙見河流入斷山

風旗雪帳野張燈獵後行厨肉似陵寄語妖狐休作態
君王臂上有神鷹

八月巫閭草半枯繡簾霜重一燈孤人生失意無南北
笑卷琵琶出塞圖

傳說林牙建義旗乍聞驚喜久成疑微軀願作遼東鶴
一夜乘風到虎思

袁 徵 一首

徵字公白吳縣人貢生有蘧莊遺藁

文彥可移居和子垂韻

機鞢桐帽野人裝家具無須載滿航臺隱客星投釣處
山留君子讀書堂宵同巢鶴聽松雨午就溪僧煮蕨香
張北周南鄰可卜結茅終擬儼君旁

明詩綜卷七十六

附錄卷十六

取北固南嶽下十餘年於其地

山皆深平餘書堂有同吳諸

跡歸林神理入著其具與

入內

